

续
山东
考古
录

卷四之卷十

續山東考古錄卷之四

滄州葉圭綬子佩甫述

東昌府上

聊城縣

周齊聊邑

春秋昭公二十年左傳晏子曰聊攝以東杜注齊西界也按

卽漢聊城縣

寰宇記聊城有微子城按微在須昌已不足據

詳東平州

聊城那

得又有微城府志云魏志聊城有畔城蓋惑於聊城有微子城又誤以殷之畔城當之按後魏時此城未必名微子城畔

城未必指爲殷城考微湄字古通用

東平之微城卽魯郕邑水經注曰湄溝上承湄

湖爾雅水草交曰湄通谷者微郭景純曰微水邊通谷其證也

據縣志圖微城所在正古轟

城轟城臨黃溝今亦稱湄河湄通於微因以名轟城正未可

知若畔城未知與微城爲一城否

或曰以臨水畔名畔城後人附會於微子城

後漢志聊城有夷儀聚劉昭注左傳僖元年邢遷於夷儀按

寰宇記巨儀城在邢州龍岡縣西百四十里此爲建武初聊

城令范升所保劉氏誤 寰宇記聊城有重邱與水經注不

符備考

詳陵縣一統志謂在荏平西南二十五里不知所據府志又據寰宇記廩邱爲重邱之誤說以駁此愈

繆春秋襄二十五年夏五月諸侯會於夷儀秋八月同盟於重邱此重邱未必非因夷儀附會者

一統志

聊城有古賴城在縣西齊境上邑按賴邑在漢營縣

詳章此

誤 通典聊城有臺城誤以僑縣爲實土也詳歷城

漢兗州東郡聊城縣及陽平縣地後漢因之魏太和元年聊城爲縣王國正始五年復故王茂徙樂陵

聊城縣故城在西北十五里今聊古廟括地志稱在縣西四

十里據唐縣卽後魏縣言通鑑胡注引作二十里似誤

晉冀州平原國聊城縣又司州陽平郡陽平縣地

補十六國志後燕平原郡有聊城漢陽郡又重出聊城

後魏濟州平原郡治聊城縣又西聊縣泰常七年於聊城縣東

四十里築城置平原鎮太和二十三年罷鎮移平原郡來治並

移聊城縣治此孝昌中於故城析置西聊縣武泰初於郡置南

冀州永安中罷又司州陽平郡陽平縣地齊周因之

後魏聊城縣故城在東北二十許里又名王城魏志聊城下有王城郡縣治有畔城水經注黃溝逕王城北魏太常七年安平王鎮平原所築世謂之王城太和二十三年罷鎮立平原郡治此也寰宇記德州下後魏移平原郡理今聊城界畔城誤矣

通典博州宋分置魏郡後魏因之按劉宋之魏郡係僑置於青州濟南郡者非博州地寰宇記紀要皆沿其誤

隋志聊城舊置南冀州未幾州廢按州廢於魏永安中通典以爲隋初廢誤西聊之省當在高齊時

隋魏州聊城縣武水縣開皇十六年於聊城置博州又析清

武陽郡

邑置武水縣大業初州廢

武水縣故城在西南四十里今沙鎮通典武水漢陽平縣地

隋改今縣按漢陽平治今莘縣武水乃分置非改置

唐河北道博

平州

治聊城縣又武水縣武德四年復於聊城置

博州貞觀元年省荏平入聊城

武德四年置見荏平

天寶元年改州爲博

平郡五代梁唐晉漢因之周顯德二年省武水縣入聊城爲鎮

後晉聊城縣故城在東南十五里又名巢陵城永樂舊志晉

開運二年河決博州城圯徙州治西南十五里曰堞陵於此

立州按西南者王城西南也縣并徙

寰宇記周廣順二年河水衝沒武水縣顯德二年割屬聊城
按割屬當云省入九域志聊城有沙冢鎮卽故武水

宋河北東路博

平郡

防禦治聊城縣

宋聊城縣卽今治宋志洧化二年河決移聊城縣於孝武渡
西按渡或作陵

金山東西路東平府博州防禦治聊城縣僞齊劉豫析置在平
元都省山東東昌路總管府治聊城縣至元四年置博州路十
三年改

明山東布政司東昌府治聊城縣

附

洪武初置平山衛

國朝因之

縣志

康熙二年修
知縣何

沿革南朝及宋仍隸東郡

北齊改屬

濟州並誤

堂邑縣

周齊清邑

春秋成公十七年左傳齊侯使國勝告難於晉待命於清杜

注清陽平樂平

今本脫
平字

縣按清在河東當爲齊地 路史黃

帝之子封於清是爲清陽

漢兗州東郡清縣發干縣

清縣故城在東南二十許里元和志樂平故城本漢清縣在

堂邑縣東三十里按寰宇記作東南今治在唐縣東十里當

在今治東南二十許里

發干縣故城在西南三十許里括地志發干故城在堂邑西南二十三里按當去今治三十許里紀要作五十里未詳何據

元和志堂邑故城在堂邑縣西北二十七里高帝五年陳嬰爲堂邑侯嬰孫午繼封尚館陶公主按此城當在今治西北三十餘里漢志臨淮郡有堂邑縣此城密邇館陶當爲陳氏封邑蓋鄉亭名未詳何縣地通典以此爲漢舊縣舊唐志堂邑下漢縣後魏廢隋復置並誤

後漢兗州東郡樂平縣發干縣章帝建初中改清爲樂平建安

十七年發干屬魏郡

見三國魏志太祖紀

魏二縣屬陽平郡

補三國志引沈志云魏立樂平非後漢東郡故縣地按沈志

樂平

此宋僑置者詳寧陽

下云魏立屬陽平郡後漢東郡有樂平非也

考魏立陽平郡發干東武陽陽平樂平皆漢東郡屬沈氏不明北方地理意謂此魏陽平郡之樂平非漢東郡之樂平不知實一縣也地形志樂平下云二漢屬東郡晉屬陽平治樂平城不云有樂平城是後魏猶仍漢舊沈氏誤矣

晉司州陽平郡樂平縣發干縣後魏因之高齊省樂平入陽平又改爲樂平省發干入清淵周因之

元和志樂平故城下引後趙錄曰東海王使征東將軍苟晞

擊汲桑石勒與晞相持戰於平原陽平閒爲晞所敗桑奔馬

牧勒奔樂平按通鑑胡注晉志陽平郡有樂平縣但石勒欲

奔漢

劉淵都平陽

則非此樂平又并州有樂平郡武帝太和中置

唐之遼州也勒奔於此考是時勒已退保清淵走赤橋

今臨清州

西往奔平陽不能返東南趨樂平縣下文載石勒招烏桓張

伏利度於樂平郡事胡說是

補十六國志後趙陽平縣下引寰宇記永嘉後并樂平按此

本魏志洪氏誤記

一統志發干南燕僑置幽州誤

詳蘭山縣

魏志發干有發干城未詳徙治何所

隋志莘縣下舊曰陽平後齊改曰樂平蓋齊省樂平入陽平
又改陽平爲樂平也又清泉下後齊廢千童縣入焉按此廢
發千入清淵其時清淵治在今冠縣清水堡也一統志發千
後齊省傳寫訛耳

隋魏州武陽縣堂邑縣開皇六年置又於樂平故城置陽平縣八年

改爲清邑十六年改爲莘亭大業二年省入莘縣

堂邑縣故城在西十里今千戶營元和志堂邑縣東至博州
六十里按州謂王城寰宇記同則誤蓋其時州已西徙也九
域志作四十里則是其時縣未東徙也

唐河北道博州平郡堂邑縣武德五年屬毛州貞觀元年屬五代

梁唐因之晉改河清縣漢復舊周因之

寰宇記晉改堂邑爲清河縣續通考周改河清縣按晉避高祖嫌名故改周改非清河貝州屬當改爲河清清河非

宋河北東路博

州平郡堂邑縣

宋堂邑縣卽今治熙寧初徙故治圯於水也

金山東西路博州堂邑縣

元都省山東東昌路堂邑縣

明山東布政司東昌府堂邑縣

國朝因之

縣志

康熙四十九年修知縣盧承玟

沿革兩漢迄北齊並置二縣至隋

乃併爲一縣改名堂邑按二縣皆齊省

周脫北

後魏兗州

東陽平郡又有樂平館陶既屬司州又屬兗州如今東昌府既屬東兗道又屬濟東道之例按竟不知屬兗者爲僞縣以今例古陋矣 五代悉如唐舊誤 古蹟以發干爲樂平以樂平爲發干

博平縣

周齊攝邑博陵邑博望邑

攝邑故城在西南三十許里又名郭城杜預曰聊城縣東北有攝城水經注黃溝逕攝城北俗稱郭城非也城東西三里南北二里東南隅有金城

大城中小城曰金城聊城昌邑皆有之

城卑下墟郭

尚存京相璠曰聊城縣東北三十里有故攝城今此去聊城

二十五六里許元和志故攝城在博平西南二十里寰宇記作二十

五按今治在唐縣東南三十里攝城當在西南三十許里寰

宇記聊城有郭城隋圖經云卽亡國郭氏之墟因俗名附會

者水經注黃溝又名郭水也魏志有畔城而無攝城疑攝城郭城畔城微城四名實一城耳

史記田敬仲世家威王六年晉伐我至博陵一作鱒陵徐廣曰東

郡之博平也通典博平齊之博陵邑也紀要博平亦謂之博

關戰國策曰趙涉河漳博關張儀說齊曰悉趙兵渡清河指

北關皆謂此也

又宣王三年三晉之王皆因田嬰朝齊王於博望按漢志南

陽郡有博望縣括地志所謂在鄧州向城縣東南四十五里者而魏志博平有博望城漢張騫許廣漢弟舜皆封博望侯廣漢封於平恩疑舜封邑在此蓋齊之博望也故址未詳

漢兗州東郡博平縣及聊城縣地攝本屬聊冀州清河郡靈縣地詳下

後漢魏因之

博平縣故城在西北三十里元和志寰宇記並以縣爲漢縣別無故城惟通典稱漢城在今縣東界後漢書注同再考

晉冀州平原國博平縣及聊城縣地清河國靈縣地

後魏濟州平原郡博平縣及聊城縣地南清河郡靈縣地齊省靈縣入博平周因之

隋貝州

清河郡

博平縣大業二年省靈縣入博平

開皇六年復置詳高唐州

又魏

武陽郡

聊城縣地

唐河北道

博平郡

博平縣武德四年省靈縣

一作靈泉

入博平

二年復置

今故城隸高唐州

貞觀十七年省博平入聊城天授二年復五代因之

宋河北東路博平

州平郡

博平縣熙寧二年割明靈砦隸清平

宋博平縣卽今治景祐中徙本寬河鎮以故治爲博平鎮

金山東西路博州博平縣

元都省山東東昌府博平縣

明山東布政司東昌府博平縣

國朝因之

縣志

道光十一年修
知縣楊祖憲

天文志後有歲運譜周襄王八年晉

公子重耳自翟適齊築臺博陵以望故國以此博陵號晉

臺按水經注博平城內有層臺秀上不知何緣知爲晉文

築敬王三十年載孔子自衛適晉至河而返事則因鳴犢

河而附會者 山川志不知後魏東魏郡之博平在今章

邱而以地形志載長白山爲錯訛

茌平縣

漢兗州東郡茌平縣青州平原郡楊虛縣

茌平縣故城在西南五十許里又名礪礪城元和志茌平故

城在聊城東五十三里按當作東南寰宇記博州東南至舊

濟州五十三里可證紀要稱在今治西二十里荏山下云秦縣治此謬甚

楊虛縣故城在

里又名陽城

漢志平原郡樓虛縣即楊虛之訛胡三省

云漢無此縣非也

水經注河水逕楊虛城在後魏荏平縣前當在今

縣東魏志荏平有陽城是也而商河所出注文明言在高唐故城西南又當在縣東北魏志祝阿有陽城是也兩說既截然兩地魏志又兩縣皆有所未詳矣一統志謂即縣南二十里之土城據河水所逕也然今治非後魏荏平況河逕楊虛城在四瀆津之後四瀆津在長清西南六十里楊虛城似不能在今治南也禹貢錐指圖據後說俟考

紀要係平原縣謬

後漢兗州濟北國茌平縣魏因之

晉冀州平原國茌平縣晉末徙治河北劉宋於此置碯礮成

元和志漢茌平城西臨黃河晉末爲河水所毀移理河北博

州界

晉無博州據唐時言之

按所徙未詳疑徙於石勒布鼓城卽後魏

治所也紀要稱徙於今治西三十里無據

水經注河水逕碯礮城西宋元嘉二十七年以王元謨爲寧

朔將軍前鋒軍碯礮守之都督劉義恭以沙城不堪守召元

謨令毀城而還後更城之魏立濟州治此也按宋但爲成所

河北非宋有此城未詳屬何縣或曰已屬盧縣理或然也

後魏濟州治濟北郡治盧縣

郡治縣之盧子城今隸東阿縣

泰常八年置濟州

於荏平故城并置盧縣

舊盧縣後魏屬濟州太原郡此析置非移治也

又平原郡荏平

縣高齊省荏平縣周因之

魏志濟州治碣磝城水經注魏立濟州故荏平縣也東與聊城分河接隋唐盧縣卽漢荏平城何代所置古無明文魏志荏平有荏平城似其時非盧縣治其盧縣下云有柳舒城盧子城皆今東阿北境地蓋荏平故城今在縣南東阿北盧卽治此明矣後魏荏平治鼓城而盧縣下云有鼓城蓋皆沿舊文書之否則指晉荏平城晉末所徙未必卽鼓城則漢城外尙有一荏平城也 紀要荏平縣大河故瀆在縣西按竟似今治卽漢治者已誤又引水經注云河水東北過荏平縣西

又東爲鄧里渠又東北逕昌鄉亭北又東逕碯礮城西碯礮城舊志謂卽荏平城誤接過荏平縣西是至其境逕碯礮城是至其城道元明言濟州爲故荏平縣元和志盧縣亦云濟州治碯礮城卽秦東郡之荏平縣顧氏以爲舊志之誤豈未全覽注文耶

後魏荏平縣故城在東 里一曰時平城一曰鼓城一曰

布鼓城一曰博固城水經注河水又逕荏平城東城內有故

臺世謂之時平城蓋荏時音相近耳疑縣徙也竟陵本無此四字道元知

碯礮城爲荏平城豈不知荏平已徙治乎四字似非原本按道元不稱此爲故城卽後魏

縣治矣魏志荏平治鼓城寰宇記聊城縣博固城隋圖經云

或謂之布鼓城卽石勒時築在大河之曲當在縣東長清西
大河折而北流處紀要引作聊河之曲謂在聊城東北二十
五里通志謂卽唐博州城皆甚謬或以爲卽戰國策齊必效
鼓之鼓邑不知是否長清志稱在其縣西卽此城也

隋濟北州

北郡

盧縣開皇六年置濟北縣大業初省入盧縣又

貝州清河

郡 荏平縣開皇初復置隋末廢

濟北縣治未詳

長清有濟北縣故城乃時平所改非此

荏平是否魏治亦無據

唐河南道

東平郡

州 盧縣博

平郡

聊城縣地盧本濟州治武德四

年析聊城置荏平縣屬博州貞觀元年省入聊城天寶元年改
濟州爲濟陽郡十三載城沒於河廢郡縣來屬五代置之宋省

新唐志盧本濟州武德四年析東平郡置隋曰濟北郡按隋

濟北郡並未并入東平蓋武德四年改濟北郡爲濟州耳此

誤 舊唐志盧縣天寶元年改爲河濟字陽郡乾元元年復

爲濟州十三載六月一日廢濟州按乾元在天寶後天寶十

三載已廢郡那得又改爲州蓋他郡改州皆在乾元元年一

例書之耳乾元以下八字當削去廢濟州當作廢濟陽郡

寰宇記濟州唐大歷中復置唐末廢新舊唐志皆不載亦未

詳仍舊治否 通典盧縣有長城寰宇記盧縣盧醫云云按

此皆混入漢盧縣記又云盧縣在州西北二十里按二十上

脫一百二字

齊乘荏平縣唐武德初以聊城之興利鎮置按九域志聊城有興利鎮似省縣後名興利鎮耳亦未詳于氏所本

太平寰宇記有盧縣元豐九域志無是宋省盧縣在太平興國後元豐前也九域志陽穀有碣礮津路史陽穀有盧城是宋時故城入陽穀而東阿平陰當各有分地

金山東西路博州荏平縣僞齊劉豫析聊城置

金荏平縣卽今治俗以爲唐冀邱縣治無據

元都省山東東昌路荏平縣

明山東布政司東昌府荏平縣

國朝因之

縣自秦漢以來治凡屢徙秦漢治接東阿陽穀後魏治接長清今果在縣境與否並無的據晉隋治是否

仍後魏舊亦無可考唐治興利于說未知何憑金治冀邱俗傳更無高論此外惟楊虛一城水經注已自互異沿革之難稽古蹟之俱盡百五州縣中荏平居首矣姑據往籍備述於篇以俟來者

縣志

康熙庚寅年修知縣王世臣

沿革晉入聊城爲興利鎮謬極南

北朝無魏古蹟樂平古壘在南二十里此卽縣南土城

因馬牧而附會者

清平縣

漢冀州清河郡厝縣地靈縣地

明靈砦本靈地西境當有貝邱縣地

厝縣故城在直隸廣平府清河縣東南三十五里

後漢冀州甘陵國

本清河桓帝改

甘陵縣地

本厝安帝改

靈縣地魏冀州清

河郡

復前漢名

甘陵縣地靈縣地晉冀州清河郡清河縣地靈縣地

後趙石勒置平晉縣爲清河郡治

補三國志魏清河郡首清河縣按晉始置清河縣此誤

詳後

平晉縣故城在西北四十里今水城屯續通典石趙初置平晉縣爲清河郡治補十六國志後趙清河縣有平晉城而後燕

反書平晉縣甚誤

後魏司州清河郡治清河縣地濟州南清河郡靈縣地

高齊洛州清河郡貝邱縣地

齊省貝邱入清河又改清河爲貝邱

周因之

周屬貝州

隋貝州清河郡及博平縣地

靈縣省入博平

開皇六年於平晉城置

貝邱縣

改高齊之貝邱爲清陽

十六年改貝邱爲清平縣隋亂廢

寰宇記貝邱下永嘉亂石趙移郡理晉城卽博州清平縣也

按晉城卽平晉城

補十六國志引有平寧

禹貢錐指稱平晉城未詳其

處偶未考及耳

唐河北道博

州平郡

清平縣武德四年復又博平縣地五代周屬

大名府

宋河北東路大名府魏郡清平縣

宋清平縣卽今治宋志熙寧二年又割博平明靈砦隸焉本

縣移治明靈按續通典以爲元豐中河決移治

金大名路大名府清平縣

元直隸都省山東德州清平縣

明山東布政司東昌府清平縣洪武元年屬恩州二年屬高唐

州三年省尋復置來屬

國朝因之

厝賦古陵清河清河郡清河國清河侯邑改名徙治諸書糾

紛錯互幾欲目迷府志清平墟郭備載諸城既多非縣境所

有辨證或欠明哲茲據諸書考訂附此 水經注經大河故

瀆自發又東逕貝邱縣故城南又東逕甘陵縣故城南注地

理志之所謂厝也漢安帝父孝德皇以太子被廢爲王薨於

此乃葬其地尊陵曰甘陵桓帝建和元年改曰甘陵縣亦取

名焉改縣是是周之甘泉市地也陵在瀆北河瀆又東逕艾

亭城南又東北逕平晉城南又東北逕靈縣故城南按平晉

城在今治西四十里又十里卽出縣境艾亭城至平晉城無

里數縱在縣境又西二十里爲屠城不在縣境明矣一統志

稱在縣南非是經屯氏別河枝津東逕信成城南甘陵城西

又東逕清陽縣故城南清河郡北注魏自清陽徙治也此曹

志兩引一作元魏誤按漢清河郡治清陽縣桓帝改清河國爲甘陵仍

治清陽故城後漢清陽省入曹魏始南徙改甘陵爲清河郡

無倚郭縣故稱清河郡經屯氏別瀆又東北逕清河郡南又

東北逕清河故城西注漢高六年封王吸爲侯國地理風俗

記曰甘陵郡東南十七里有清河故城世謂之鵠城也按此

清河郡卽曹魏郡在甘陵縣北非卽甘陵縣故經曰郡不曰

縣此清河城乃漢之鄉亭侯城班志清河郡無清河縣故經

曰城不曰縣又考史記表作清陽侯王吸與班表異或吸封

本清陽別築城爲侯邑班表誤作清河總之非清陽縣城亦

非厝縣城則甚明或因鵲城之名與厝城混爲一非是

經屯

氏河

自信

又東逕甘陵縣故城北按屯氏河在別河之南甘

陵縣卽厝縣城在其南鵲城在其北此非一城明證

經 漯水

自聊

城北又東北逕清河縣故城北

注

地里風俗記曰甘陵故清

河清河在東南一十七里今於甘陵東南無城以擬之直東

二十里有艾亭城東南四十里有此城疑卽清河城也後蠻

居之故世稱蠻城

經

又東北逕文鄉城東南又東北逕博平

縣故城南

注

黃溝承聊城郭水東北逕清河城南又東南逕

攝城北按注此處最茫昧尋繹久之知誤引應記也漯在河

瀆南河瀆北爲厝城厝城北爲屯氏河屯氏河北爲清河侯

城城北爲別河別河北爲魏清河郡城城北爲別枝津津北

爲清陽縣城卽甘陵郡城應氏所謂甘陵故清河者指清陽

縣城所謂東南十七里之清河城指鵲城道元於屯氏別河

已引此條此忽於漯南求之漯未嘗絕大河故瀆屯氏河而

北流烏能逕鵲城之北哉

府志稱漯所逕清河縣城當是郡城比原注又多隔屯別及枝津二

水愈謬其引此注亦多建和二年改曰甘陵縣亦取名焉十三字

河瀆自甘陵縣南又東逕

艾亭城非甘陵郡東有艾亭城也旣誤以清河縣城爲清河

侯城又誤以甘陵縣東南作甘陵郡東南里數不符尤其顯者雖然漯水自此城北又東北歷文鄉城卽至博平故城南而黃溝逕此城在聊城後攝城前是此城當在古聊攝二城之間

攝西北聊東北

固非漢清河侯城亦非厝城西南七里之晉清

河縣城道元時已不可考卽果爲蠻城抑誰代之縣哉意者

石勒清河郡治平晉縣此其清河縣歟

如經文係晉以前人作則此愈不可解矣

括地志清陽故城在清河東北八里按此晉清河縣東北

之厝城與寰宇記晉於厝城西南七里置清河縣對看自明

隋清陽縣卽此城此誤以爲漢清陽縣城 後漢書章懷注

甘陵故城在清河縣西北按此誤以漢信成縣城爲甘陵城

蓋高齊清河郡治此城

其時無信成縣移武城縣於其城

漢甘陵郡本清河

郡遂致此誤

通典清平下漢清陽縣按隋清陽治厓城清

平本厓地遂致此誤又清陽下漢貝邱縣按高齊貝邱治厓

城隋改清陽遂致此誤元和志清河縣本漢信成縣地後

漢省信成縣置清河縣至隋不改按唐清河縣本信成地而

後漢並無清河縣晉清河縣在厓城西南七里後魏移故厓

城隋移於信成城東南謂至隋不改可乎寰宇記清河縣

秦厓縣漢爲信成縣後漢桓帝改爲甘陵縣在今縣西北續

漢書州郡志省信成縣屬清河郡按郡國記云隋清陽城內

有漢清河王慶陵在今郡東南三十五里故厓城是也後漢

安帝改爲甘陵仍爲甘陵國治後國除復爲郡晉省於厝城西南七里置清河縣魏又爲清河縣并清河郡於故厝城中高齊天保七年又移清河縣於古信城隋開皇六年又移清河縣於州城貝州城卽今縣理也按厝與信成前漢並置非改厝爲信成安帝改厝爲甘陵非改信成爲甘陵在唐宋清河縣西北者乃信成非厝縣與下文在今郡東南云云不自矛盾耶安帝改縣桓帝改郡乃謂安桓皆改縣不自牴牾耶高齊移者乃清河郡非縣其時移武城縣於彼隋還武城於故城始置清河縣於新貝州城中 又清陽縣漢時又爲貝邱縣古清陽之地在今縣東南後漢省入甘陵

當云省入厝縣蓋省縣時厝猶

未改名
甘陵也
西晉省於此清河縣理置清陽縣復漢名至唐永昌

元年西移於永濟渠東孔橋置開元二十二年又移於今理

按隋清陽縣卽漢厝縣城西晉省以下十四字定有脫文當

作西晉省甘陵縣於其西南七里置清河縣後魏移治故甘

陵城卽厝高齊改貝邱隋改清陽方無挂漏又云古清陽縣城

在縣東南三十五里唐開元二十二年後清陽清河同爲貝州倚郭漢桓帝改爲甘

陵郡後魏孝昌三年葛榮賊亂以城內有甘陵高大因據陵

爲堡賊平遂置清陽按城中有甘陵乃厝城非清陽城前清

河縣下以爲隋清陽最當此又以爲古清陽甘陵郡城何耶

後魏此城乃清河縣並未改置清陽又云故清河郡城在縣

東南二十五里高祖封王吸爲侯食邑於此景帝三年封王子乘爲清河王改爲清河國並在此城桓帝改爲甘陵郡至高齊天保七年移縣於漢信成置今州西北故貝邱城是也按此方是漢清陽縣城清河郡城然與清河侯城混爲一高齊自漢厝城後魏清河郡縣城移清河郡於古信成城非自此城移縣也此城自曹魏移郡後已廢矣又云故厝城在縣東南三十里漢安帝改爲甘陵土人號曰鵲城按此卽上文所謂古清陽城乃分爲二與鵲城又混爲一又云甘陵在縣城內按此竟似甘陵在唐宋清陽城內矣以上諸書紛如亂絲今旣理其糾紛差能得其端緒試統計諸城而以水道

爲之限觀者庶易明了乎漢清陽縣城清河郡城清河國城
甘陵國城甘陵郡城五名一城在直隸清河縣東南二十五
里又在屯氏別河枝津之北魏清河郡城一名一城在別河
枝津之南別河之北漢清河侯城鵲城二名一城在漢甘陵
郡城東南十七里又在別河之南屯氏河之北漢厝縣城後
漢甘陵縣城後魏清河縣城郡城高齊貝邱縣城隋及唐初
清陽縣城六名一城在直隸清河縣東南三十五里晉清河
縣城一名一城在漢厝城西南七里漢貝邱縣城在石趙臨
清縣東南五十里後魏貝邱縣城在漢貝邱城東北十里石
趙平晉縣城清河郡城隋初貝邱縣城改清平縣城水城在

今清平西四十里三城五名以上凡五城九名在屯氏河之

南大河故瀆之北蠻城不知何代清河縣城二名一城在河

瀆及漯瀆之南黃溝之北通共九城十五名

惟艾亭城非郡縣治故不計

其間水六道自漢清陽縣城南至蠻城約七八十里乃府志

以蠻城爲清陽縣城則是聊城東北之黃溝北流絕五水至

今直隸清河境又折而南流絕五水而入漯也繆已極矣

禹貢

錐指屯氏諸河圖此九域祇載一漢

貝邱城蓋亦未能了然故概從略耳

平晉城移清河郡於故信城然則自石趙歷後魏郡皆治平

晉城矣與清河下後魏并郡於厝城之語又自兩歧酈氏不

言平晉城爲當時郡治樂氏似誤

縣志
嘉慶三年修
知縣萬承紹

續山東考古錄卷之五

滄州葉圭綬子佩甫述

東昌府下

莘縣

周齊莘邑

莘亭在北八里春秋桓公十六年左傳衛宣公使急子於齊使盜待諸莘將殺之杜注莘衛邑陽平縣西北有莘亭水經注漯水逕陽平城東又北絕莘道句城之西北有莘亭京相璠曰今陽平縣北一十里有改莘亭道阨限蹊自衛適齊之道也按絕莘道句絕城屬下句指陽平城或讀作莘道城道

可絕城可絕耶潔水自陽平城東東北絕莘道而莘亭自在西北蓋潔在莘亭東也或讀作逕莘亭城之西北愈謬

漢兖州東郡陽平縣東武陽縣後漢末東武陽爲東郡治又築

新城

詳朝

徙郡縣治之魏陽平縣屬冀州陽平郡黃初七年爲

縣王國太和六年復故

王粲進封北海

陽平縣卽今縣治水經注潔水

自武陽新城

東北逕東武陽縣故

城南今城四周紹

字疑誤或衍

圍郭尙存水而隍塹於城東北合

爲一瀆東北出郭逕陽平縣之岡城西逕陽平故城東按舊

說以縣南七里之斗城爲漢陽平城與潔逕岡城西卽逕陽

平城東說合

岡城在縣東南七里

但北去莘亭十五里以古里計之幾

二十里與十里之數太不符今治在莘亭南八里得古十里與潔先逕岡城後逕陽平城亦無不合

東武陽縣故城在東南十里又名頓城通志以故城爲新城而別出頓城謬矣

後漢書劉植傳注東武陽故城在今魏州華陽縣南按華莘字之訛又衍陽字也

據水經注武陽縣新城魏武守郡所治故城滅洪爲東郡所治蓋袁紹破洪幾無子遺城亦頽廢故徙治也補三國志陽平有頓城是謂縣已徙新城也而東武陽下又有新城誤

後漢書章懷注曹操爲東郡太守治東武陽故城在今魏州莘縣按曹操所治在新城

晉司州陽平郡陽平縣永嘉後併樂平後魏太和二十一年復

魏志陽平有陽平城所徙當卽斗城

高齊洛州陽平郡樂平縣齊省樂平入陽平又改陽平爲樂平

宇文周毛州武陽郡治樂平縣建德七年置郡

寰宇記周武陽郡城在莘縣南卽斗城矣蓋於魏縣置郡

隋魏州武陽郡莘縣開皇初廢武陽郡十六年於縣置莘州大業二

年州廢改樂平爲莘縣省莘亭縣入之詳堂邑來屬

隋志莘舊曰陽平後齊改曰樂平後周置武陽郡開皇六年

復曰陽平八年改爲清邑十六年置莘州大業初州廢改縣

名莘又廢莘亭縣入焉按據此似隋初陽平卽周樂平而莘

亭縣何代置在何地耶元和志莘縣隋開皇六年又於樂平

故城置陽平縣屬魏州八年改陽平爲清邑大業二年改爲
莘縣按據此又似莘縣卽樂平故城矣而何時移陽平城耶
寰宇記莘縣漢陽平縣開皇八年改陽平爲清邑十六年於
縣置莘州故樂平縣爲莘亭縣大業二年廢莘州其年改清
邑爲莘縣按據此又似清邑之改卽漢陽平矣考齊已改陽
平爲樂平則隋於漢樂平城置陽平縣元和志爲允八年改
清邑十六年改莘亭乃改於樂平城所置之陽平而此縣之
名樂平如故則寰宇記故樂平縣爲莘亭爲允大業二年莘
州廢以州名爲縣名遂改樂平爲莘縣而省莘亭入之又以
隋志州廢改縣名莘又廢莘亭縣入焉爲允合三書之錯互

而會通之然後得其沿革之實但據一書鮮不誤矣一統志
紀要以莘亭縣爲古莘亭固繆府志引元和志寰宇記云隋
開皇六年又於樂平故城置莘亭縣元和志無此文寰宇記
在十六年與隋志合不在六年亦未會通其說耳

唐河北道魏州

郡

莘縣武德五年復置莘州貞觀元年州廢來屬

五代因之

通典莘縣下漢東武陽故城在今縣南又有陽平縣隋新置

莘州按玩此文義似隋縣與州非唐縣也寰宇記引郡國志

云頓城在縣東南十里與今同似隋猶仍後魏之舊唐復還

漢治也

元和志莘亭在北十三里疑古城較大故差二里若至斗城則少四里似唐還今治矣

舊唐志

隋置新州武德五年改爲莘州按此誤看通典新置莘州語
通鑑五代梁乾化元年二月晉將周德威自臨清攻貝州拔
夏津高唐攻博州拔東武朝城胡注漢東郡東武陽縣後魏
曰武陽唐開元七年更名朝城管地猶有地名東武按旣云
朝城又云東武明是兩地如屬朝城何須別書況唐朝城卽
武陽新城而故城又不隸朝城胡氏似曲爲之說是年十月
貝州又奏晉寇東武又似貝州東武城者存疑俟考

宋河北東路大名府魏郡莘縣

金大名路大名府莘縣

元都省山東東昌路莘縣

明山東布政司東昌府莘縣

國朝因之

縣志

康熙壬子年修
知縣劉維

沿革周爲武陽郡莘亭縣 隋爲陽

平改清邑 唐爲莘亭縣武德四年改莘縣三條並誤

莘州貞觀四年改又云莘亭俱廢復置縣按改者言改莘
縣爲州也唐於縣置州非改州爲縣俱廢者言州與莘亭
縣俱廢復置者復置莘縣也蓋誤以唐之州爲今散州故
前云改縣爲州後云改州爲縣表則州縣同列謬極

冠縣

周晉黃邑

黃邑故城在南 里今黃城村史記田敬仲世家齊宣公四
十三年伐晉毀黃城圍陽狐括地志黃城在冠縣南十里陽
狐城在元城縣東北三十里按縣與元城接齊所毀卽此黃
城矣寰宇記引郡國志云俗名黃壘紀要誤以爲漢山陽郡

黃縣

漢後漢魏晉館陶縣地清淵縣地

後魏司州陽平郡清淵縣及館陶縣地齊省發干入清淵周因
之

後魏清淵縣故城在東北四十里今清水鎮魏志清淵有清
淵城則已徙治齊省發干入之唐省入冠氏後魏治卽清水

鎮無疑

隋魏

州

冠氏縣開皇六年析館陶縣置屬毛州大業二年來

屬又

貝州清河郡

清淵縣大業二年省貝邱入清淵

紀要以隋冠氏爲古冠氏邑云在今縣北金徙今治又引杜

預說冠氏卽館陶也隋因置冠氏縣其於館陶故城反不引

杜說蓋不知漢館陶縣城卽古冠氏城故以此爲古冠氏考

元和志王莽河北去縣十八里今縣北有汰黃隄卽大河故

瀆南有黃城里數相符似隋縣卽今治金人移治並無明據

縣北又無遺址顧說殊不足憑俟再考

唐河北道魏

州

冠氏縣武德五年與清水縣

卽清淵縣高祖名改

並屬毛

州貞觀元年省清水入冠氏爲鎮來屬五代因之

新舊唐志武德五年以臨清清水等縣置毛州紀要清水堡

下云志稱唐初置清水縣唐志不載清水縣也按志稱唐初

置固稍誤顧氏失考甚矣 九域志冠氏有清水鎮

宋河北東路大名府魏郡冠氏縣

金大名路大名府冠氏縣

元直隸都省山東冠州初屬東昌路至元二年升冠氏縣爲冠

州

明山東布政司東昌府冠縣洪武三年降州爲縣來屬

國朝因之

縣西北一百里衛河北有固獻鎮
疑亦古縣治也附識於此備考

縣志

道光十年修
知縣梁永康

沿革隋以前但書清淵不合又云隋析

清泉置冠氏考元和志隋析館陶置冠氏非析清淵隋志

淵作泉乃唐避諱隋縣未改名又唐省清泉並誤 古蹟

誤以喬亭城爲古冠氏又誤以爲隋縣

館陶縣

續通典城西北七里
有陶邱亦曰陶山趙置館其側
漢因以名縣按陶卽今窰字廢窰皆可名陶邱或以

爲濟所出謬矣陶當讀
若堯今作桃音非也

周晉冠氏邑後析入趙

春秋哀公十五年左傳子貢曰昔晉人伐衛齊爲衛故代晉

冠氏杜注在定九年冠氏陽平館陶縣

附卜夫子故里考縣
西南七十里自西河

寨河上村有卜夫子祠卜氏聚族居焉祠無碑刻自始莫考
今按家語史記徐廣注皆稱子夏爲衛人獨禮記鄭疏以爲

魏人水經注河水篇徐水東南逕子夏陵北東入河河水又南逕子夏石室又南過汾陰縣西是與家語顯不合矣夫子夏退老西河之上猶來會子三罪之責投杖而拜則兩賢相見可知豈曾子亦遠遊秦晉耶春秋時並無魏國子夏爲魏文侯師時已百數十歲老遊於彼死而葬焉固未可知也實所居西河並非龍門西河之西河蓋周定王五年後東移其故瀆亦名西河濬縣志有云河濱在西十里亦西河宋李垂上導河形勢書有云請自汲郡東推禹故道復西河故蹟不但此也戰國時魏西門豹爲西河守卽漢之魏郡也以魏論亦不徒其西境有西河矣家語旣稱子夏爲人則所居西河在此不在彼明甚後人徒知魏西境有西河而音同子夏又適爲文侯師遂附會於彼耳縣西南正西河故道所逕南接大名開州皆古衛地窮僻鄉村更無好事者爲之附會夫子故里其在茲乎曹州志下堽村有子夏墓

漢冀州魏郡館陶縣及清河郡貝邱縣地

西境館陶地今治以東貝邱地東西之間

當有清淵縣地後漢因之魏於館陶置陽平郡黃初六年爲縣王國太

和六年復故

王霖進封東海王

或曰石勒徙陽平郡治此

水經注清淇水又北逕喬亭城西東去館陶縣故城十五里
卽春秋所謂冠氏也按舊以縣西南三十五里南館陶鎮爲
漢縣城考元和志屯氏河在館陶西二里與水經注屯氏河
逕館陶縣東之說不合魏志館陶有館陶城是後魏已非漢
治唐治當是後魏縣卽南館陶漢治似尙在其西也俟再考
據水經注清淵故城當在清淇故道東南平恩故城之東臨
清故城西南縣西十里馬頭村之西北七八里有古城俗曰
清陽城縣志以爲漢光武追銅馬賊處彼乃清河清陽縣府
志已辨其謾余曾目驗其地卽清淵故城也蓋邱縣之東漳
河卽清淇故道自平恩故城東逕此城西臨清故城在此

城東北則清陽卽清淵音轉陽淵本同母字也惜無別據附
此備考

魏志陽平郡魏文帝黃初二年分魏置治館陶城水經注亦
稱館陶爲魏陽平郡治獨元和志云館陶魏屬陽平郡石趙
移陽平郡理此考三國志云建安十八年分魏郡置東西部
都尉黃初二年以魏郡東部爲陽平郡不云治館陶未詳孰
是補三國志及十六國志兩說並用蓋未覺其牴牾耳

晉司州陽平郡館陶縣冀州清河國貝邱縣地

後魏司州陽平郡治館陶縣

南館陶是晉不書郡治者以兩說互異也

郡治縣之館

陶故城

據魏志郡縣不同城

又清河郡貝邱縣地齊因之

齊省貝邱入清河又改爲貝邱

縣境當仍有貝邱地石趙以後縣
當有臨清縣地清淵未省未敢斷

宇文周毛州治陽平郡治館陶縣大象二年於陽平郡置毛州

顏師古曰屯音大門反而隋氏誤以爲毛氏河乃置毛州按

毛州周置見隋志非隋置夫屯氏河名載在古史周人建州

何至誤讀作毛顏氏世近周隋必其時實有是稱元和志亦

有作屯州者或後人追改之

隋魏州武陽郡館陶縣開皇初廢陽平郡大業二年廢毛州來屬又

貝州清河郡清淵縣地隋復置貝邱省入清淵也

唐河北道魏州館陶縣永濟縣武德二年復置毛州周隋唐初州郡治或

治漢城仍魏舊或與縣同治皆不可考貞觀元年州廢來屬大歷七年析臨清置

永濟縣

本古貝邱縣地隋入清淵唐清水入冠氏北境析入臨清

屬貝州天祐三年來屬五

代周永濟屬大名府

永濟縣卽今縣治元和志貝州永濟縣東北至州百一十里

本漢貝邱縣地臨清之南偏大歷七年田承嗣奏於張橋行

市置

寰字記稱張橋店

西臨

字今本訛井據寰字記改

永濟渠故以爲名永濟渠

在縣西郭內按唐臨清在今臨清州西三十五里東北至貝

州六十里永濟縣至州百一十里則至臨清縣五十里今治

在臨清故城南偏西五十里永濟渠卽今衛河在西門外五

里水道稍西去

府舊志云館陶縣大歷中改名永濟新志駁之固

是抑知今治本永濟故址此誤說正其確證近志係永濟故

城於臨清從無知其所在者詎知卽今館陶縣治乎

宋河北東路大名府魏郡館陶縣及臨清縣地熙寧五年省永濟縣入臨清爲鎮

金大名路大名府館陶縣

金館陶縣卽唐永濟縣故城近志稱五代時徙今治考元豐九域志館陶京北四千五里而臨清有永濟鎮是宋猶在舊治也金志館陶有館陶鎮而臨清無永濟鎮金徙今治無疑矣 續通考臨清州下唐析置永濟縣宋初省入臨清後廢爲鎮尋復置按旣云省入不得又云後廢爲鎮永濟復置宋金志不載俟考

元直隸都省山東濮州館陶縣初屬東平路至元五年屬

明山東布政司東昌府臨清州館陶縣洪武二年屬東昌府三年省尋復宏治二年屬

國朝山東布政司東昌府館陶縣

縣志

高唐州

周齊莒邑

春秋昭公三年左傳齊侯田於莒杜注齊東境邑又十年傳陳桓子盡致其邑於公而請老於莒又云公與桓子莒之旁邑辭穆孟姬爲之請高唐陳氏始大按此莒古無考及者魏

志零縣有莒城東近高唐故城石晉時改縣名齊城蓋其時
猶有知爲齊莒城者杜氏以爲齊東境邑或齊侯所田別一
地歟此城卽高齊高唐縣

漢冀州清河郡靈縣後漢初省永元九年復魏晉因之

靈縣故城在南三十里今南鎮九域志之南劉鎮也通鑑

齊至靈邱胡三省曰史記正義云靈邱河東蔚州縣今按蔚

邱請士師之地班志曰齊地北有千乘清河以南漢清河郡

有靈縣清河河北接趙魏之境此爲近之按四書釋地以胡氏
說爲臆度余謂靈縣正齊邊地又與趙魏接臆度而合固無害也紀要齊靈邱在滕縣尤無根據

後魏濟州南清河郡治零縣靈縣魏志作零郡治縣之莒城普泰中分

平原郡置魏志誤作晉泰寧高齊郡縣皆廢天保七年移高唐縣來治

廢郡城

齊高唐當屬
洛州清河郡

周屬毛州

隋書樂運爲毛州高
唐令未詳屬何郡

後魏南清河郡故城卽高齊高唐縣故城在東南 里魏志

南清河郡治莒城隋志高唐下云後魏置南清河郡後齊郡

廢知隋高唐縣卽莒城矣元和志章邱下云齊天保七年自

高唐故城徙此考隋初兩高唐並置是齊高唐並未自故城

徙彼據三齊記劉宋僑高唐卽隋之章邱詳章邱則元和志云

云乃高唐自故城徙莒城李氏混入僑縣耳胡三省曰唐博

州高唐縣漢靈縣地最當而徙治何代從無考及者

隋貝州高唐縣開皇六年復置靈縣大業初省入博平

唐河北道博平郡高唐縣武德四年復置靈縣茲據舊唐志新
唐志作靈泉

四年省入博平

貞觀中省博平其地析入聊城高唐博平雖復靈縣故城遂迄今隸高唐

長壽二年

改高唐曰崇武神龍元年復故五代梁改曰魚邱

寰宇記作重邱續通考作

魚邱今有魚邱驛

唐復故晉改曰齊城漢復故周因之

宋河北東路博

州平郡高唐縣

金山東西路博州高唐縣

元和志高唐縣西南至州百二十里黃河在東四十五里寰

宇記故靈城在今縣西二十里按唐博州在今府東北二十

里今州至府百一十里比唐時遠二十里反近十里不合一

東至黃河故道

趙牛岔河

六十許里不合二視故靈城在南不在

西不合三今治非唐故治卽非莒城明矣石晉改縣名齊城

而齊城鎮在州東南 里其地西南至唐博州祝故縣城

東去黃河故道方向里數無不合卽古莒城無疑元豐九域

志高唐至州百一十里與今同其時州卽今府治知府治莒

城無反近十里之理金志高唐有齊城鎮則徙今治其在宋

元豐前石晉後乎

寰宇記大河故瀆在高唐東十七里今夾灘河卽河故瀆今治至彼與此合寰宇記

本雜集諸書而成一縣之下或據故治或據當時往往並見當分別觀之九域志無齊城鎮宋或

未立此鎮不足疑也 齊乘以今高唐爲漢高唐縣非古邑

府志謂今州卽漢縣亦卽古邑皆謬

齊乘凡非元濟南益都般陽所屬皆謂之齊邑

外屬高唐其一也考證曰古高唐城在禹城南五十里禹城西南境與高唐州接亦齊履所至不必以其非古高唐而外

之按此非于氏本意

元直隸都省山東高唐州治高唐縣初縣屬東平路至元七年於縣置高唐州

明山東布政司東昌府高唐州洪武初廢高唐縣其地直隸高唐州

國朝因之雍正八年直隸布政司十二年復故

州志

道光十年

年修

沿革齊高唐邑漢迄後魏高唐縣

內有南宋混

實土於僑縣隋冀州部清河郡高唐縣又云博州開皇十

六年置統縣三高唐聊城堂邑清河郡統縣九高唐武城

平原臨清清平鄒清泉博平茌平接隋聊城堂邑屬武陽

郡高唐屬清河郡博州置而旋廢乃與清河郡並書誤一

清河郡不止九縣誤二旣云高唐屬博州又云屬清河誤
三隋博州領縣古無明文杜撰云云誤四旣屬冀州部又
書博州誤五 元至元七年升州領縣三恩夏津武城按
元州治高唐縣何反不書元恩州並非縣

恩縣

漢冀州清河郡繹幕縣東陽縣

繹幕縣故城在東北 里寰宇記平原縣繹幕故城在西北

二十里 引郡國志云殷王祖乙時置驛於此 據水經注當在大河故瀆之西今

縣東南至平原縣治僅二十五里縣東馬頰河卽大河故瀆

與平原分水驛幕城當在河西今治東北

東陽縣故城在西六十里俗曰高黎郭據水經注東陽故城在屯別枝津之北東武城故城東北三十里寰宇記歷亭縣

東陽故城在縣西十七里按此城在縣境或武城境無的據

姑係此備考

春秋襄公二十三年齊伐晉趙勝帥東陽之師以追之杜注東陽晉之山東魏郡廣平以北昭

二十二年荀吳畧東陽杜注晉之山東邑按此邑字當作地其時東陽無邑也

後漢冀州清河國繹幕縣及東武城縣地郇縣地魏晉因之

水經注引應劭曰東武城東北三十里有陽鄉故縣也是省

入東武城也

其東境析入廣川縣

而元和志寰宇記並云後漢省東陽

縣其地屬郇縣蓋指唐宋歷亭縣治所言

後魏冀州安德郡繹幕縣長樂郡索盧縣地司州清河郡武城

縣地濟州南清河郡鄒縣地眞君三年省繹幕入武城太和二

十一年復齊省繹幕縣

鄒縣索盧齊皆省

周因之

晉分廣川縣置索盧縣

索盧水名今武城西之黃路河

今縣境無其地後魏

神瑞二年併入廣川太和二十二年復其城南徙在直隸故

城縣境縣之漳南鎮其南境也

寰宇記稱後魏始置且在太和十八年皆不合

高齊繹幕等三縣皆省武城已徙於漢信成城縣境在齊周

當爲平原

東境鄒省入平原

武城棗強地

西北境盧省入棗強

寰宇記稱

歷亭縣自後魏及高齊其地屬鄒高齊省鄒入平原隋志有

明文未見耶 舊唐志漳南縣漢東陽縣後魏省誤

隋

貝州清河郡

歷亭縣及漳南縣地開皇十六年析武城置歷亭縣

系上... 卷之三
開皇六年析棗強置東陽縣十八年改名漳南

歷亭縣故城在西南

里寰宇記地理志歷縣屬信都國

在修縣界隋開皇十六年於今縣東南永濟渠南置歷亭縣
遙取漢歷縣爲名按隋縣在舊治東南當在今縣西南但其
地非永濟渠所至疑亦在舊治西南傳寫訛也 舊唐志稱
隋分鄆縣置考縣與鄆同年置隋志分武城置此誤

寰宇記隋開皇六年分棗強於今漳南縣東北二十二里置

東陽縣按元初升歷亭故城鎮爲故城縣卽隋漳南故城

舊唐志漳南縣隋分棗強清平二縣地復置於古東陽城按

隋清平不能及縣境亦非古東陽城

隋復置繹幕據德州志別有隋城其縣後省入安德似非漢

治亦未詳復置後今縣有其地否故不書不書有平原地亦因此

唐河北道貝州清河郡歷亭縣漳南縣及安德州郡平原縣地武德六

年徙貝州來治歷亭七年移漳南縣來治八年州還治清河五

代因之

唐歷亭縣故城在西四十里續通典歷亭縣唐萬歲登封元

年移就盤河置一統志作龍盤河按府志未見此文以唐縣與隋縣

混爲一而與宋縣分爲二蓋寰宇記但云後以其地下溼鹹

鹵移就盤河置在古歷亭西七十里未載移治之年誤之也

武德六年移貝州治歷亭仍是隋縣府志係隋縣後則是

唐漳南縣故城在西北五十里今漳南鎮寰宇記漳南縣唐

武德七年移於今理府志據元和志皇朝因之一語亦與隋

縣混爲一

元和志永濟渠在漳南縣東五十里亦據隋縣言

宋河北東路

恩州清河郡

歷亭縣至和二年

據宋志通考作元年

省漳南縣入

之爲鎮又

安德州郡

平原縣地

府志唐天寶間省漳南入歷亭未知所據今從宋志

金大名路大名府恩州治歷亭縣又山東西路德州平原縣地

元直隸都省山東恩州至元二年廢歷亭縣其地直隸恩州屬

東平路七年析隸省部元初析置故城縣

明山東布政司東昌府高唐州恩縣洪武二年降州爲縣

明恩縣卽今治洪武七年徙本許官店

國朝山東布政司東昌府恩縣

縣志

明萬歷己亥年修知縣孫國朝雍正元年續

陳學海

沿革宋以前皆貝州

沿革與縣無涉

漢至後魏不書何縣齊周書貝邱

齊貝邱卽

漢唐縣後魏清河未必及縣境

隋唐但書歷亭無漳南皆不合北齊移

郡治於陽平之武城按齊移清河郡於漢信成城移武城

倚郭何嘗移郡治陽平武城耶

臨清志亦有此誤

隋志清河郡

改曰清河縣置貝州按隋初廢郡存州非改郡爲縣貝州

周置

東昌府補遺

聊城縣

路史聊莒卽墨皆齊東界按聊爲齊極西邑此甚誤

魏書路恃慶傳路思令拜陽平太守又割冀州之清河相州之

陽平齊

當作濟

州之平原

汲古閣本平字誤出清河之上

以爲南冀州以思令爲

刺史按地形志不載南冀州所統屬蓋統此三郡也

堂邑縣

路史清非一一在鄆漢封空中同者或謂少昊國注云衛地在

東阿東北一在濮注云清邱魯地一在并解注云宣十二年赤

狄伐晉清者一在故樂平按樂平卽清所改亦卽空中同所封

清邱衛地

荏平縣

晉書謝元傳遣濟北太守丁匡據碻磝是東晉時碻磝城已爲濟北郡治也 補東晉志濟北郡領縣可考者二盧縣下云有碻磝按碻磝本漢荏平縣城劉宋時尚未於此立盧縣東晉時正難定爲何縣地

宋史夏侯嶠傳高祖秀爲濟州鉅野鎮遊奕使因家焉父浦梁開平中以明經至棣州錄事按夏侯秀乃浦之曾祖當爲唐代人寰宇記稱唐大歷中復置濟州唐末又廢定有所本而唐志失載也但鉅野初不屬濟州或復置濟州鉅野屬之歟舊五代

史唐莊宗紀滅梁濟州刺史孟瑒上章請死詔原之則濟州當是後唐廢非唐末廢也或曰復置卽治鉅野後唐廢後周復置仍其舊耳備考

清平縣

府志清平縣後唐省爲清平鎮宋復置未詳所本

館陶縣

唐書劉黑闥傳皇太子齊王悉兵戰館陶黑闥大敗引軍走躡北至毛州按隋志毛州置於館陶據此傳似州縣非一城或周置毛州與陽平郡同治館陶故城縣城則後魏所徙也 又魏徵傳云魏州曲城人而宰相世系表云館陶魏氏出漢兗州刺

史衡曾孫珉始居館陶珉孫彥後魏光州長史徵卽彥之曾孫然則徵是館陶人館陶唐屬魏州曲城乃後魏光州東萊郡屬唐時無此縣或彥之後有居曲城者因而致誤歟

金史食貨志鹽法篇大定二十八年置巡捕使其一在永濟縣據此是永濟曾復置續通考定有所本館陶徙治在世宗後矣

高唐州

魏書房亮傳普太中濟州刺史張瓊表所部置南清河郡仍請房悅爲太守可證地形志晉奉寧之誤

北齊書循吏傳蘇瓊爲南清河太守零陵縣民魏雙成失牛云云按陵字衍

州有唐高唐知州陳公去思碑碑文爲前明東昌知府某磨去
刻東昌府界數字僅存碑額考高唐元始置州山左金石志疑
爲藩鎮僭據者所立然知州之名始於宋唐無此稱也惜原文
不可考矣

州城東南有石碣題曰東方朔故里此等附會殆不可以理解
者

續山東考古錄卷之六

滄州葉圭綬子佩甫述

泰安府上

泰安縣

周齊博邑又魯龍邑陽關邑謹邑蜀邑莒裘邑陽橋邑防邑又
鑄國

春秋哀公十一年左傳公會吳子伐齊五月克博按禮名山
大川不以封泰山當周初必不隸侯國春秋齊魯以長城巨
防爲界泰山在長城南詩稱魯邦所瞻博邑在山南三十許
里卻屬齊魯遂界汶上疑後析入齊耳卽漢縣

系上頁云金一考二ノ
春秋成公二年左傳齊侯圍龍杜注在博縣西南水經注汶

水

自博城東

又西南逕龍鄉故城南按據此龍城當在汶右岸縣

志圖及張廷模泰安縣圖此城在汶左岸志云縣東南五十

里大汶口東十餘里有城基俗曰鄉城卽龍城與酈注杜注

皆不合

此處汶水本非故道詳水考

俟再考一史記功臣表有龍侯陳畧

水經注謂卽龍城而漢書表作龍陽又有龍侯摎廣德史記

表作龍亢王念孫曰史表是

陽關故城在東南六十里今陽關村春秋襄公十七年左傳

逆臧紇自陽關

春秋桓公三年齊侯送姜氏於讜杜注蛇邱縣西有下讜亭

水經注蛇水又西南逕夏暉城南經書公會齊侯於下謹是

也按據此謹城當在今大會河西與北又當在小會河東

溝水

逕其西也縣志下謹城在西南一百十里有下暉村其圖

此城在大會河東名謹莊與酈注杜注皆不合俟再考

春秋成公二年楚侵魯及於陽橋遂盟於蜀杜注博縣西北有蜀亭陸澄曰博縣有陽橋今皆未詳其地

菟裘故城在東南 里今婁德鎮春秋隱公十一年左傳

公使營菟裘吾將老焉杜注在梁父縣南後漢志梁父有菟

裘聚水經注汶水篇淄水出梁父縣東南西南流逕菟裘城北

又逕梁父縣故城南

菟裘北卽梁父南故不云又西

又西南逕柴縣故城北

按據此是菟裘在梁父城南今小汶南岸柴城村東北元和

志稱在泗水縣北五十五里今婁德鎮在小汶南

淄今名濁河與小汶

合流入汶羊祜城

卽梁父城

隔小汶在其北柴城村在其西南泗水縣

在其南五十許里鎮有孫觀墓碑云葬菟裘東節義鄉仁里

之原觀宋泗水縣人可爲明據通志稱在泗水西十五里誤

魯防邑凡五而臧氏之防杜注無明文考春秋襄十七年齊

高厚圍臧紇於防師自陽關逆臧孫魏志博平鉅平兩縣皆

有防城蓋在兩縣界上卽魯臧氏防矣宣叔娶鑄地本相近

史記周武王封堯後於鑄春秋襄公二十三年左傳臧宣叔

娶於鑄杜注今蛇邱縣治

路史謂卽祝誤會樂記
實疏祝或爲鑄之文也

後漢志奉高縣劉昭注左傳昭八年大蒐於紅至於商衛紅亭在縣西北杜預曰接宋衛也按杜注紅魯地沛國蕭縣西有紅亭遠疑不云在奉高劉氏於沛國虹縣亦引蒐紅可知並無確見矣 春秋僖公元年左傳公賜季友汶陽之田杜注汶水北地寰宇記謝過城在汶陽田齊以此歸魯謝過故有城存按汶陽似非邑名但地歸人而築城恐無此理則此城或護守此田者有城則汶陽亦邑矣近志此城在東北十五里與水經注蛇水逕汶陽田不符張圖汶北有汶陽城以爲漢縣非是或卽謝過城歟

史記楚漢之際月表濟北王田安都博陽通鑑胡注正義曰

博陽在濟北班志太山郡盧縣濟北王都豈博陽卽此地耶
今按濟北有博關博陽蓋博關之南也又漢四年田橫走博
陽注此據史記也班書作橫走博博陽近清河博關此正韓
信自趙進兵之路臨淄旣破君相皆出走其後韓信旣虜田
廣於濰水灌嬰又敗田廣於嬴下嬴縣亦屬太山郡此博陽
卽博城之陽按班志濟北王都乃文帝前元年分齊置濟北
王劉興居所都自春秋迄漢盧未改名似非博陽漢書灌嬰
傳云追齊相田橫至嬴博又云攻下嬴博則史記田橫所走
之博陽卽博無疑漢六年以膠東膠西臨淄濟北曹參傳還定濟北郡
蓋三齊并爲一改國爲郡也師古注云時未有濟北郡史追書之偶未考耳博陽城陽郡七十三

縣立子肥爲齊王此濟北博陽非一地之證

胡注博陽於秦漢兵爭之時亦

嘗置郡按博陽本濟北王都疑田榮并濟北分爲兩郡

鄒陽傳城陽顧於盧博孟康曰

盧博濟北王治處此盧博爲兩縣又博陽卽博之證

齊北初郡博而

後都盧故兼舉之其實治博而非博縣城治盧亦非盧縣城也又見平陰

灌嬰傳又云齊地已定

嬰別將擊楚公杲於魯北破之轉南破薛郡長身虜騎將入

攻博陽可見博之外又有博陽要在博縣南不遠胡氏謂卽

博城之陽近是

漢兗州泰山郡初屬濟北國武帝時屬朝廷

漢地志郡爲高帝置而郊祀志稱武

帝時濟北王獻泰山旁邑五嶽始皆在天子之郡則前屬濟北國矣

治奉高縣

武帝始置此縣以前泰山郡疑治博

也又博縣柴縣梁父縣鉅平縣蛇邱縣

奉高縣故城在東五十里今東故縣莊水經注汶水出原山西南過嬴縣南又東南過奉高縣北縣北有吳季札子墓在汶水南曲中季札之聘上國喪子嬴博之間卽此處也從征記曰嬴縣西六十里有季札兒冢汶屈從縣西南流縣志嬴城在東五十里下云據水經注汶水出萊蕪原山西南過嬴縣南計原山至此百許里何獨不詳所經且嬴博奉高三邑皆在三四十里內今萊蕪縣北不置一縣亦非漢時牙錯某置之制且從征記云嬴縣西六十里有季札兒冢今嬴距博三十餘里安得其西六十里爲嬴博之間乎則嬴城應在萊蕪明矣此城宜爲奉高故城原志所謂奉高城本漢志有明

堂在西南四里今按漢明堂東北皆山谿危徑無可築城之地茲仍原志而存是說按此說最允羸縣卽萊蕪城子縣東故縣在其西南五十許里卽奉高城甚明應劭漢官儀云馬第伯封禪記二十二日晨燎升山封畢詔百官以次下半夜

後到明日上壽賜百官省事省畢發幕宿奉高三十里

後漢書章

帝紀元和二年二月辛未幸太山柴告岱宗進幸奉高壬申宗祀五帝於汶上明堂如奉高明堂在山下不得以進幸書矣明堂自在汶水上太平御覽引齊記云羸博二縣共界漢去山麓數十里也

武帝封禪割置此縣以供祀太山故曰奉高治嶽東北四十

里

山海經郭注泰山在奉高縣西北此東北當作東南據二書奉高城所在較然明白

今山東麓至東故縣三十餘里各舉成數故里數小異原志

不可從也若汶水自羸趨奉高乃西南流而經云東南今汶

逕奉高南而經注皆云過奉高北蓋縣東北仙臺嶺有水東

南流至東故縣西屈而西南流與汶合名天津河通志以爲

汶之正源

水出泰山謂之汶
此說正自不謬

古汶蓋先與此水合屈而東南

過奉高西北季札兒冢卽在此曲中後改道而南此水遂於
奉高城西南入汶縣志或疑於此改東南作西南非也若奉
高城果在今所謂漢明堂東北四里則汶必逆上泰山方能
逕其北季札兒冢且在泰山上矣驗之今固無其蹟推之古
詎有是理耶然則奉高卽東故縣無疑矣紀要奉高城在縣
東北十七里第從漢志計之耳又考漢書郊祀志初天子封

泰山泰山東北陟古時有明堂處處險不敞上欲治明堂奉高旁未曉其制濟南人公王帶上黃帝時明堂圖明堂圖中有一殿四面無壁以茅蓋通水水圍宮垣云云於是上奉高作明堂汶上如帶圖據此是武帝方以古明堂險阻不宏敞斷無仍作於險狹處之理且明堂作於奉高旁汶水之上今所謂漢明堂者正在險狹之處南去汶水甚遠與此志種種不合據水經注環水合北汶後通稱環水又東南流逕南明堂下漢武帝云云引漢志見上古引水爲壁雍處基瀆存焉又東左合汶水互詳水考是園宮之水卽北汶其地濱北汶可知特古北汶合環水東逕博縣北又東合大汶大汶方西南逕徂

徠山西博城東與今迥異其故道合大汶處今不可考故漢明堂故址愈難確指鄭注稱南明堂則必指古明堂爲北明堂今所指漢明堂倘卽北明堂乎近志此明堂之東北又有周明堂稱漢稱周者不知有何依據余謂周明堂當在故縣西南備志所見俟考

博縣故城在東南三十里今舊縣村

柴縣故城在東南九十八里今柴城村

梁父縣故城在東南九十里今羊祜城據水經注梁父城在淄水之北通典泗水下漢梁父故城在縣北元和志泗水縣梁父山在北八十里西接徠山今羊祜城在小汶北徠徠

山南

羊祜城北卽梁父山南去泗水縣八十里可驗也近世統名徂徠山遂以隋梁父縣北一山當之

與諸

書吻合羊祜卽梁父音訛耳

鉅平縣故城在南徼東五十里近志謂在寧陽非是

蛇邱縣故城在西南

里據水經注蛇邱城在蛇水東汶

水第逕其南境不逕其城下今大會河發源入汶皆在縣境

或謂蛇邱城在今肥城非是

縣西南六十里有西故縣莊近志無考及者縣西南除蛇邱外

自漢迄今無他縣治但在蛇水西未敢逕斷

後漢兗州泰山郡治奉高縣博縣梁父縣鉅平縣濟北國蛇邱

縣魏晉因之南燕慕容德兗州或治梁父劉宋同晉

後漢晉皆有鉅平縣補三國志無之考劉宋志泰山太守下

云永初郡國無鉅平縣洪氏本此越典午而同寄奴恐不然
後魏兗州泰山郡治博平縣及奉高縣鉅平縣梁父縣濟州東
濟北郡蛇邱縣

隋志博城下舊置泰山郡後齊改郡曰東平是後魏泰山郡
已治博平矣

魏志鉅平治平樂城有鉅平城平樂城今無考

魏志梁父有梁父城徂徠山在北疑徙治卽岱山城
高齊兗州東平郡治博平縣及梁父縣岱山縣周因之

隋志博城舊曰博按後魏名博平不名博或齊復名博歟闕
之俟考又云併博陵牟人焉按後魏無博陵縣未詳

岱山縣故城在東南七十里俗曰安固寰宇記廢岱山縣在乾封縣東南四十里依徂徠山北齊於此置隋開皇三年廢爲奉高縣按蓋齊廢奉高縣改後魏梁父爲岱山隋初又改名奉高隋志云有奉高縣開皇六年改曰岱山樂史失載六年改岱山隋志失載三年改奉高張圖岱山城北依徂徠山

梁父山在徂徠東蓋統稱徂徠由來久矣

隋

兗州魯郡

博城縣梁父縣開皇初廢東平郡三年改岱山曰奉高

六年復故十六年改博曰汶陽尋改博城大業初省岱山入之

隋志博城下大業初州廢按隋初廢東平郡縣隸兗州時州治瑕邱州廢與縣無涉五字似衍

隋梁父縣故城在東南九十里小汶南寰宇記廢梁父縣在乾封縣東南五十九里隋開皇二年移梁父縣於此接近世所謂漢梁父縣城卽此城也

唐河南道兗州魯郡乾封縣及泗水縣地徂徠以南皆是隋梁父未省故不書武德五

年於博城置東秦州并置岱縣貞觀元年州廢省梁父嬴肥城

岱四縣入焉長安元年更名乾封總章元年復名博城神龍元

年仍改乾封元和十七年省萊蕪縣入之卽後魏嬴縣詳萊蕪太和五年

復析置五代因之

寰宇記唐武德七年移梁父縣入博城置然則東秦州是時

有博城梁父兩倚郭縣矣 岱縣當仍岱山舊治

元和志乾封元年析長安以置乾封長安元年廢乃於岱山
下改博城爲乾封乾封長安二縣下此文同新舊唐志並以爲乾封元年
博城更名乾封今不從

宋京東西路襄慶府奉符縣及泗水縣地大中祥符元年改乾

封爲奉符

宋猶書泗水地據寰宇記泗水梁父城也金以後未詳何時割到

宋志奉符本漢乾符開寶五年徙岱岳鎮按當作本唐乾封

水經注岱山有上中下三廟元和志岳廟在乾封縣西北三

十里泰山之南按此卽下廟所謂岱岳鎮也卽今治 紀要

大中祥符初改曰奉符又築新城在今治東南三里

府志沿革作三

十里城池 而以岱岳鎮爲舊城

志作三里

卷之十一
九
金山東西路泰安州治奉符縣初於縣置泰寧軍大定二十二
年升泰安州

紀要金還治岱鎮

顧氏本泰山志未詳
志所本姑從備考

元直隸都省山東泰安州治奉符縣州初屬東平路至元五年

析隸省部

明山東布政司濟南府泰安州洪武初廢奉符縣其地直隸於
州來屬

國朝山東布政司泰安府治泰安縣初因明舊雍正二年州直
隸布政司十三年升府置泰安縣爲府治

縣志

道光八年修
知縣徐宗幹

沿革表漢奉高博兩縣地按古蹟有梁

父鉅平柴蛇邱等城不止兩縣地 古蹟羊祜城卽晉南

城羊祜封邑按南城在費縣

新泰縣

周魯平陽邑

春秋宣公八年冬城平陽杜注今泰山有平陽縣

漢兗州泰山郡東平陽縣

河東郡有平陽縣故此加東

後漢省魏復

東平陽縣卽今縣治城南有遺址劉宋志魏志新泰下並云

魏置言魏復置東平陽非已改新泰也舊唐志新泰下漢東

新泰縣晉去東字誤甚紀要稱故城在縣西非是

晉兗州泰山郡新泰縣初曰平陽後改

嶺山表考古錄 卷之六 新泰縣

元和志新泰縣魯平陽邑也晉武帝泰始中鎮南將軍羊祜
此縣人也表改爲新泰縣按不書漢縣似晉改魯邑名矣不
合改名水經注在元康元年未知孰是考羊祜傳祜南城人
武帝詔以泰山之南武陽牟南城梁父平陽五縣爲南城郡
封祜爲南城侯置相與郡公同祜讓不拜新泰與南城中隔
南武陽卞等縣地唐新泰亦不能有南城地考後漢書羊續
爲泰山平陽人祜卽續之孫蓋其後遷於南城逕以叔子爲

新泰人顯與本傳不合

山東運河備覽東平陽後漢省入南城誤由元和志

劉朱徐州東安郡新泰縣

後魏東安郡新泰縣後魏置與此非一縣也

後魏北徐州東泰山郡新泰縣兗州魯郡汶陽縣地

魏志汶陽有新甫山

高齊北徐州

郡新泰縣省東安郡新泰縣入之

詳蒙陰

周屬

沂州

郡

東泰山郡未詳何時廢齊周新泰未知屬何郡

隋

沂州

新泰縣及

兗州魯郡

泗水縣地

通考泗水有新甫山

唐河南道

沂州

新泰縣武德五年屬莒州貞觀八年來屬又

兗州魯郡

泗水縣地五代因之

宋京東東路

沂州

新泰縣及

魯郡

泗水縣地

金山東西路泰安州新泰縣及兗州泗水縣地

元直隸都省山東泰安州新泰縣至元二年省入萊蕪三十一

年復元初析置行新泰縣

後改蒙陰詳蒙陰

今蒙陰自高齊迄金大約皆新泰地而新泰新甫山以西則

皆泗水地元復置蒙陰縣境與今同矣

明山東布政司濟南府泰安州新泰縣

國朝山東布政司泰安府新泰縣初因明舊雍正十二年屬泰安直隸州十三年州升府仍舊屬

縣志

乾隆四十九年修
知縣江乾達

沿革元魏蒙陰併入新泰魏書孝

武析沂水置新泰北齊復置蒙陰尋省入新泰按此因隋志新泰下後齊廢蒙陰入焉一語想當然而杜撰者元魏固無蒙陰尤無沂水其誤又因元和志沂水卽新泰之文

詳蒙陰

隋代忽敘入沂水沿革尤謬

萊蕪縣

周齊羸邑平州邑又牟國

春秋桓公三年公會齊侯於羸杜注齊邑今泰山羸縣

又宣公九年公會齊侯於平州杜注齊地在泰山牟縣西漢

書高惠高后文功臣侯表有平州侯昭涉掉尾元狩五年免

景武昭宣元成功臣侯表有平州侯王峽下有梁父字蓋昭

涉掉尾免後又封王峽漢爲梁父縣地晉屬牟縣也魏志牟

縣有平州城

周書史記篇穆王召左史戎夫取遂事之要戒以下所言國名有平州或卽此平州也備考

又桓公十五年邾人牟人葛人來朝杜注牟國今泰山牟縣

漢兗州泰山郡羸縣牟縣及萊蕪縣地梁父縣地後漢因之後

漢末分泰山置羸郡旋廢魏晉因之晉牟縣或作東牟

羸縣故城在西北四十里今城子縣括地志羸縣故城在博

城縣東北百許里此城在原山西南汶水北與水經注合

見引

秦安西南去博城里數相符爲羸縣故城無疑

唐初屬博城括地志云然

牟縣故城在縣東二十里

縣北抵原山有萊蕪地矣平州漢梁父地晉雖屬牟縣縣西

境仍有梁父地

補三國志羸縣下蜀志糜竺傳爲羸郡太守注載魏武表云

泰山郡界曠遠權時之宜可分五縣爲羸郡

羸縣外餘四縣今不可考

後旋廢也

據杜預說

見前

晉牟縣並未改名東牟也宋魏志皆無晉改東

牟之說況牟國本在此齊遷之今福山及寧海州地遂稱東牟無改牟爲東牟之理考東牟縣後漢廢晉會置東牟郡或亦曾復置東牟縣晉志不載置東牟郡而此縣書東牟並有誤乃補三國志此縣改書東牟縱晉果改似不可以例魏劉宋兗州泰山郡羸縣牟縣後魏因之

劉宋省萊蕪縣其地析入羸牟貝邱三縣

詳博山

後魏羸縣故城在北八十里今文字城魏志羸有羸城元和志萊蕪縣後魏移古羸縣於此又云韶山在縣西北二十里今韶山一作杓山在文字城西北二十里其明證已舊唐志以爲古萊蕪城誤魏志牟縣有牟城未詳移治何所

高齊兗州東平郡羸縣省牟縣入博城縣周因之

隋

兗州魯郡

羸縣開皇十六年析博城置牟城縣大業初省入羸縣

唐河南道

兗州魯郡

萊蕪縣貞觀元年省羸縣入博城長安四年於

後魏羸縣城復置萊蕪縣元和十七年省入乾封太和五年復

五代因之周顯德元年以萊蕪監置廣利軍六年仍爲監

新唐志萊蕪下本隸淄州武德六年省入博城按舊唐志元

和志並稱貞觀初省羸入博城長安四年又於廢羸縣置萊

蕪縣萊蕪自劉宋省迄隋未復新唐志乾封下亦稱貞觀元

年廢羸入博城此蓋因萊蕪故城隋唐以來隸淄川而誤通

志稱武德四年省羸入博城調停兩說而無的據反與兩說

皆不合矣

萊蕪監故城卽今縣治寰宇記萊蕪監在萊蕪縣界古鐵冶

之務也

漢羸縣有鐵官。鹽鐵官例不書。獨書此者以其爲今縣城也。管一十八冶縣監不

相統又云礦坑阜在監北五里卽今縣北五里之礦山也魯

西治在監西三十里卽今縣西三十里魯西集也東有汶陽

冶今縣東有汶洋保南有汶南冶今縣南有汶南保可證也

宋京東西路觀夏府萊蕪縣

金山東西路泰安州萊蕪縣

一統志金廢萊蕪監縣徙今治當在此時舊說今治卽唐宋

萊蕪縣非也

元直隸都省山東泰安州萊蕪縣

明山東布政司濟南府泰安州萊蕪縣
洪武元年直隸濟南府
二年屬

國朝山東布政司泰安府萊蕪縣
初因明舊雍正十二年屬泰安直隸州十三年州升府仍舊屬

縣志

康熙

年修

沿革 萊蕪邑誤

歷代皆云是時與

邑並建者某某縣唐則乾封宋則奉符金則奉符新泰元

則奉符長清既非縣境又非州郡全境殊不可解 古蹟

牟北魏省入嬴博城俗名城子縣並誤

肥城縣

古肥國遂國周入齊又齊平陰邑棘邑京茲邑

應劭漢書注肥城古肥子國按肥國不見於春秋戰國時樂
正子春謂其弟子曰子適齊過肥肥有君子焉其時或自國
或齊邑不可考矣卽漢肥城縣

遂國故城在南四十里今清泉驛

宋安寧鎮

春秋莊公十三年夏

齊人滅遂杜注在蛇邱縣東北水經注溝水出馬山西南流

逕棘亭南南去汶八十里又西南逕遂城東地理志曰蛇邱

隧鄉故隧國也

此郡國志非地理志

京相璠曰隧在蛇邱東北十里杜

預亦以爲然縣東北無城以擬之今城在蛇邱西北蓋杜預

傳疑之非也又西逕下謹城西按溝水今小會河

土人猶名溝水河通

志以為發源縣西四十里馬頭山即馬山南流逕清泉驛城

東即道元所謂遂國矣史記正義故遂城在龔邱縣西北七

十六里里數正合或謂在今寧陽西北史記齊桓公五年伐

魯魯將師敗魯莊公獻遂邑以平按據此似遂早滅於魯者

或魯先得其旁邑歟左傳昭八年史趙曰舜重之以明德寘

德於遂遂世守之蓋夏時舊國

春秋成公三年叔孫僑如帥師圍棘杜注汶陽田之邑在蛇

邱縣按棘蓋齊邑魯圍之如晉圍葛矣傳曰取汶陽之田棘不服圍之但今

馬山南至汶尚無八十里棘在馬山南且汶陽田邑至汶似

不能八十里疑有誤秦安能確指姑係此備考

舊係秦安

平陰故城在西北六十里春秋襄公十八年左傳晉伐齊齊

侯禦諸平陰塹防門而守之廣里杜注平陰在盧縣東北其

城南有防門於門外作塹橫行廣一里後漢志盧有光里今有廣里鋪蓋後人以

名地非古邑名水經注京相璠曰平陰在盧縣西南十里城南有長

城道所由名防門去平陰三里紀要以防門爲魯城氏防邑此齊地非是杜說誤

又中軍克京茲杜注在平陰西南亦在縣西境

漢兗州泰山郡肥成縣及富成縣地後漢省肥成析入蛇邱盧

縣魏晉因之

肥成縣卽今治水經注泌水出肥脫成字縣東北自源西南流

逕肥成縣故城南左逕句窳亭北按泌今康河發源縣東北

西南逕城南又西南逕鳳皇山西山卽句窳亭地後魏復置

曰治肥成魏志元復置曰於舊城設雖屢經廢置治未改紀要

稱故城在縣西魏志富成有左邱明冢今在縣境

後漢書章帝元和二年鳳皇集肥成句窳亭魏志肥成後漢

屬濟北晉罷是後漢魏並有肥成明證而後漢志無此縣或

章帝後省安順後復歟姑從俟考 又宗室四王三侯傳光

武以章少孤試守平陰令章懷注平陰縣屬河南郡應劭曰

在平津南故曰平陰在今洛陽縣東北濟州平陰縣東北五

里亦有平陰故城按章所守者是河南平陰注兩存濟州

平陰故城豈不知隋以前此平陰未置縣耶唐平陰卽今平

陰古平陰去彼不止五里 補十六國志前趙祝阿下晉書
載記曹嶷遂略地西下祝阿平陰按平陰此時非縣當屬盧
縣平陰城耳

劉宋兗州濟北郡治肥城故城仍爲盧蛇邱富成地

劉宋無肥城縣隋志肥城下云宋置濟北郡宋書太始三年
肥城等戍皆不附於魏蓋爲郡治未置縣也

後魏濟州東濟北郡治肥城縣孝昌三年置郡 郡本宋有蓋魏郡治盧子城此

加東字耳又兗州東平郡富成縣地高齊併郡於濟北郡

宇文周濟州肥城郡治肥城縣建德七年置郡尋廢又復

寰宇記混入後魏濟州治詎知一爲漢肥城一爲漢荏平耶

隋濟

州北郡

肥城縣及平陰縣地開皇中廢肥城郡來屬隋亂廢

元和志平陰縣隋於今縣西北二十八里置榆山縣大業二

年移於今理仍改名平陰通志今平陰西北無城以當之惟

肥城縣有榆城鄉縣南有紫榆山肥城本由平陰析置卽隋

縣之故址也按平陰西北去黃河十里河北不惟無榆山城

並無榆山今肥城西南二十八里有古城俗曰晒書城

俗傳孔子

晒書處在城南二十五里紫榆山南似卽隋縣城也後以去肥

城較近又徙今平陰耳元和志疑有誤通志以爲今肥城非

唐乾封龔邱平陰縣地武德五年復置肥城縣貞觀元年省析

入博城平陰

寰宇記平陰有故肥城

五代因之

宋奉符縣地平陰縣地金因之

元都省山東濟寧路肥城縣至元中復

元志肥城下至元十三年以平陰之辛寨鎮東北十五里

是當

二十五里舊城改設今縣平陰下云至元十三年以縣之辛寨

德等四鄉分析他屬明年改寨爲肥城作中縣然則置縣在

十四年矣

明山東布政司濟南府肥城縣洪武元年屬濟寧府二年來屬

附洪武初置肥城千戶所

國朝山東布政司泰安府肥城縣初因明舊雍正十二年屬泰

安直隸州十三年州升府仍舊屬 裁千戶所

縣志

康熙十一年
修知縣伊任

沿革夏兗州之域按縣爲禹貢徐州地

春秋齊地戰國屬魯按春秋戰國當皆齊地惟遂似曾

屬魯

誤以後魏東濟北郡爲治碭碭戍

誤以肥城縣

爲周復

誤以隋濟州爲今濟寧州

泰山之麓明矣又云自奉高發九十里至梁甫古九十里當今五十許里今故縣莊至羊祜城正合此數

宋史五行志大中祥符元年乾封縣奉高鄉民田禾異畝同穎縣廢爲鄉卽以爲名也

元史百官志大德二年置泰安長官司掌民一百有一戶

此與臨邑

曹州長官司當卽與州縣同治

新泰縣

魏書羊深傳泰山平陽人按平陽晉已改名新泰此誤

萊蕪縣

路史牟國泰山牟縣今文甚又云漢牟縣今奉符亦誤

泰安府補遺

泰安縣

路史鑄國卽祝國誤 又謹亭在濟之乘邱又云乘邱唐入鉅野按謹亭在蛇邱誤作乘邱乘邱屬泰山誤作屬濟隋改乘氏爲乘邱省入鉅野誤作唐省朱濟州治鉅野誤作古濟北入鉅野者乃漢山陽之乘氏誤作漢泰山之乘邱 又衛國杜預云奉高西北有衛亭昭八年接商衛者按康叔所封之外何嘗更有衛國杜預亦無此注

後漢書注引封禪記二月十二日宿奉高國家居太守府舍東方諸侯雒中小侯齋城外汶水上據此奉高城實瀕汶水不在

宋書文帝紀元嘉八年檀道濟破索虜於東壽張東字下脫平
字道濟傳有平字

郡國利病書通鑑裴度討李師道請令田宏正自楊劉渡河直
指鄆州至陽穀置營宏正奉命自楊劉渡河距鄆四十里築壘
師道遣劉悟屯於陽穀夜半還兵天未明抵城下胡注九域志
陽穀在州西一百三十里非也去州百三十里者乃今陽穀在
西北楊劉在州正北不應楊劉渡河迂至西又轉而東且悟以
三鼓還師安得未明行百三十里此陽穀乃今陽穀店在州北
四十里卽度所令置營地也按此陽穀乃古邑胡氏旣誤以爲
陽穀縣又誤以宋縣爲唐縣但唐鄆州在今州西北十五里北

東平州

山河兩戒考微樂鼎銘云王命微樂繼治九服用錫康嗣魯休當是魯之支庶有封於微者卽州境微城按無專鼎頌壺頌敦並有魯休字自是古人常語積古齋鐘鼎款識魯休猶言嘉休余謂魯同鹵大也與魯國無涉路史須昌魯東鄆邑甚謬後漢志壽張下云春秋曰汶水經注誤本此又云有堂聚故聚屬東郡按水經注壽張有壽聚此涉上文堂陽亭誤又衍下聚字耳

晉志後漢順帝改濟東爲東平按前漢已改濟東爲東平並未復名濟東此志疑誤

去陽穀店無四十里置營之處當尙在陽穀店之北 唐末五

代每稱鄆州爲汶陽見於冊府元龜及新舊五代史者指不勝

屈舊史張延播盧順密傳逕云汶陽人吳巒傳云汶陽盧縣人

新史作鄆州盧縣人和疑傳云汶陽須昌人竟似鄆州改名汶陽者殊不

合 舊史范延光傳徙鎮天平又稱爲汶上

五代會要周廣順元年升曹州爲彰信軍以鄆州隸之按鄆州

自爲天平軍治周並未廢節度恐無此制再考

宋咸平三年徙州治宋志作陽鄉姚鉉傳作汶陽鄉

東阿縣

宋書符瑞志晉海西公泰和元年陽穀獻白兔考陽穀亭晉爲

須昌縣地白兔出此當書須昌獻不得越縣而書亭也且東晉海西公時東平非所有非此陽穀明矣晉志揚州宜城郡春穀縣下注云孝武改春爲陽蓋避鄭太后諱也海西時獻白兔者定是此縣而補東晉志係之東阿陽穀亭下甚誤晉陽穀亭隸須昌杜預有明文而據元和志係之東阿誤而又誤矣

郡國利病書通鑑田宏正奏敗師道兵於東阿注云東阿漢古縣唐屬鄆州九域志在州西北六十里與今舊縣相合而舊志載宋時始由阿城遷於南穀審如所紀則唐時邑城方在故阿去州百里而遙矣然則南穀有城不自宋始也按唐鄆州在今東平西北十五里唐東阿在州西北四十五里見元和志卽後

魏復立之東阿並非漢縣宋咸平二年州徙今東平故九域志作六十里宋初兩遷余雖疑之然尙恐或別有據觀顧氏第謂舊志云爾可知竟出於近志之附會矣特唐東阿在漢縣東二十里具載元和志顧氏云云竟似唐已徙南穀者夫通鑑所載固唐代事胡氏所引乃宋人書烏足爲唐縣已徙南穀之證乎後漢書注東阿今濟州縣是章懷亦不知其時非漢始也宋史五行志太平興國四年鄆州清汶二水漲壞東陽縣民田陽阿字筆誤

續山東考古錄卷之七

滄州葉圭綬子佩甫述

泰安府下

東平州

周須句國宿國鄆國須句滅於邾地入魯宿鄆入齊改宿爲無鹽邑又魯郕邑郕邑陽州邑齊陽穀邑壽邑

須句國故城當在今州西春秋僖公二十一年左傳須句風

姓也杜注須句在須昌縣西北

此誤詳下

春秋隱公元年及宋人盟於宿杜注宿東平無鹽縣

又莊公三十年齊人降鄆杜注無鹽縣東北有鄆城按卽漢

縣

郟邑故城在東南四十里今郟亭集春秋昭公二十五年左傳奔郟杜注在無鹽縣東南

春秋莊公二十八年冬築郟杜注魯下邑

詳下古本作糜公穀傳皆作微

又襄公三十一年齊侵陽州昭公二十五年公孫於齊次於陽州杜注齊魯境上邑春秋大事記謂在州西北紀要乾隆志並言在州東北考昭公此行由陽州而平陰而野井在州東北近是今州東北有大陽莊

公羊作揚州

陽穀邑在西北三十五里今王古店春秋僖公三年齊侯宋公江人黃人會於陽穀杜注在須昌縣北元和志東阿縣陽

穀亭在東南四十二里今王古店猶在州與東阿境上

唐東阿在

今縣西二十六里

昭公二十九年齊侯以陽穀與昭公子衍是時公

方依齊非與魯也

史記秦伐齊取剛壽壽卽壽聚

詳下

班固曰壽良魯地蓋後入

齊也

春秋會吳於良卽漢東海良成縣非此地壽張有高粱亭見汶上疑漢縣以壽與高粱得名耳

漢兗州東郡須昌縣壽良縣及泰山郡桃鄉縣地又東平國治

無鹽縣景帝中六年分梁置濟東國武帝元鼎元年改大河郡

宣帝甘露六年改東平國又章縣

卽

富成縣

戴村壩古四汶口桃鄉地也

須昌縣故城在西北十五里

壽良縣故城在西南里

東平國故城在東二十里今須城村

無鹽縣故城在東二十里今無鹽村

章縣故城在東七十許里今鄆城集五城並詳下

富城縣故城在東八十許里水經注濟水東北過壽張縣西

界安民亭南汶水從東來注之又北逕須胸城西注城側臨

濟水杜預曰須胸在須昌西北非也地理志壽張縣西北有

胸城者是也郡國志訛狗城濟水西有安民亭亭北對安民山東臨

濟水水東即無鹽縣界也經又逕微鄉東注春秋築鄆京相

璠曰公羊傳謂之微在東平壽張縣西北三十里杜預曰有

微子冢經又北過須昌縣西京相璠曰須胸一國二城兩名

蓋遷都須昌胸是其本

烏知須昌非秦縣乎此或有本

秦以爲縣又汶水

自春

亭北又西南過東

一本脫此字

平章縣南

注故城在無鹽城東北五

十里又南泌水

自句竈亭西

又西南逕富城縣故城西又西南注

於汶

經汶

又西南過無鹽縣南又西南過壽張縣北又西南逕

安民亭南注於濟

注

汶水自桃鄉四分謂之四汶口左二汶

雙流西南至無鹽縣之郟鄉城南其城無南面又西南云云

詳水考

次一汶

此右左汶

西逕郟亭北又西至壽張故城東遂爲澤

渚其右一汶

此右汶

西逕無鹽縣故城南又西逕洽鄉城南又

西南逕壽張縣故城北春秋之良邑也

此誤

縣有壽聚又西南

長直溝水注之水出須昌縣城東北穀陽山南逕須昌城東

又南漆溝水注焉水出無鹽城東北五里阜山下西逕無鹽
故城北水側有東平憲王蒼冢其水又西流注長直溝水奇
分爲二一水逕須昌南入濟一水南流注於汶汶又西入濟
按微城卽魯鄆邑微子城在山西潞城縣東北十五里鄭康
成謂微在殷之圻內則在彼不在此此城當在州西紀要謂
在今壽張南非是 秦漢魏晉宋後魏隋唐須昌縣皆在須
昌城在今州西北十五里宋志有明據下須句城當在其西
南蓋漢時其城屬壽良也元和志稱鄆州理故須句城其城
在濟水東二里與須句城側臨濟水不合則仍治須昌城矣
紀要以今治爲須句城今治尙在右右汶之北愈不能側臨

濟水又以齊須昌縣爲須句城則尤謬 東平國王城與無

鹽縣城漢縣城與後魏縣城皆非一城通典須昌下漢無鹽

故城在今縣東又有漢東平國故城並在今縣東此國縣有

兩城明證魏志無鹽有無鹽城元和志須昌下云前此須昌

縣此卽國城劉宋移縣與郡同治齊改須昌李氏誤以爲漢須昌而以州理須昌爲須句城在今須昌縣

東南三十二里無鹽故城在縣東三十六里此須昌卽後魏

無鹽又漢縣魏縣有兩城明證州北大清河卽漆溝故渠水

側有東平憲王墓可證州東二十許里無鹽村有古城府志

誤作邱城在大清河南小清河北卽右右汶此古宿國漢無鹽縣

城也此城隔大清河之北須城村有古城在州東二十里此

東平國後魏無鹽縣齊須昌縣隋宿城縣唐東平縣城也

安民亭在州西南五十里

有安民山可證近志稱在州西十里誤

實壽張之西

境右左汶卽州南龍拱河卽亭在南可證逕卽亭後卽至壽張故城東右右汶逕壽張城北在逕無鹽洽鄉後而須胸城實在壽張城之西北則壽張城當在今州西南不甚遠州西南五十里壽張集乃後魏濟州壽張非漢縣 富城當在州東與肥城接界處或云近平陰不合

後漢兗州東平國治無鹽縣又須昌縣富城縣章縣壽張縣本

壽良光武改名魏黃初五年壽張爲縣王國太和六年復故

王徽

進封

東平 晉省章縣

後漢志無鹽有章城蓋王莽改桃鄉曰鄆亭魏志無鹽有南章城卽桃鄉城非章縣也

三國魏志東平靈王徽黃初四年徙封壽張王

自廬江徙封此

五年

改封壽張縣按魏黃初五年普降諸王爲縣王四年猶未降壽張本縣名疑四年徙封東平王誤作壽張

補東晉志東平郡下晉書孝武太元十九年東平太守韋簡

及慕容垂將尹國戰於平陸據此則東晉已改郡矣補十六

國志前秦東平國下引晉書苻堅東平太守楊光稱國誤矣

劉宋兗州東平郡治無鹽縣及須昌縣壽張縣後魏復置富城

劉宋志無鹽寄治郡下前此不與國郡同城可知須昌壽張

亦寄治郡下若陽平郡之樂平館陶則寄治無鹽蓋漢無鹽

縣城其分地在今汶上寧陽故此不書明帝時東郡太守鎮

無鹽亦寄治也范縣亦寄治郡下今州境無其地

魏志富城有富城蓋復置非漢治也今未詳

高齊兗州東平郡須昌縣郡移治博廢無鹽縣移須昌治之

隋志宿城下後齊曰須昌舊置東平郡後齊並廢按此並字當指郡與無鹽郡字下當有及無鹽縣四字不然齊未廢須昌也元和志東平縣古宿國兩漢爲無鹽地後齊於此置須昌縣屬東平郡按數語最核實非漢無鹽縣城乃其地非秦漢須昌乃齊須昌東平郡雖廢又改東泰山郡爲東平郡縣仍屬之宿國亦謂其地非其城其須昌縣下又以此爲漢須昌直以宿爲須句矣舊唐志誤同

壽張富城當皆齊省

隋之壽張乃後魏濟州之壽張非此壽張

隋

鄆州東平郡

須昌縣宿城縣開皇十六年改須昌

後魏無鹽高齊須昌

爲宿

城須昌還治須昌故城

唐河南道

鄆州東平郡

治天平軍節度舊治須昌縣貞觀八年省宿

城人之自鄆城移州來治景龍元年

舊唐志作景雲誤

復置宿城縣天

寶十三載併濟陽郡貞元三年

據元和志寰宇記作元年

升都督府四年

舊唐

志誤作貞觀四年

改宿城爲東平移入州城

與須昌同倚鄆元和十五年賜軍

號太和四年改東平爲天平六年省入須昌五代梁因之唐改

須城晉漢周因之

新唐志鄆州領縣九舊唐志云領縣十而所列仍九縣蓋天

平未省前原文也

通鑑辨誤武德四年徐圓朗昌州刺史劉善行來降史炤曰昌州本蒲縣此時圓朗據充州自以須昌縣置昌州耳蒲縣之昌州圓朗安能有之耶據此是隋唐之際縣爲徐氏昌州矣

宋京東西路東平府東平郡天平軍節度治須城縣慶歷三年於郡置京東西路安撫使大觀元年升大都督府政和四年移安撫使於應天府宣和九年改爲東平府

宋須城縣卽今州治宋志咸平三年移治於東南十五里陽鄉之高原鄆州並徙後鄆州還治鄆城按陽鄉疑卽洽鄉九

域志

江浙本

作東平府舊鄆州東平郡而鄆城自屬濟州宋志

同皆無鄆州徙鄆城事是鄆州升府後別無鄆州也疑誤

金山東西路轉運使治東平府天平節度治須城縣

元都省山東東平路總管府治須城縣太祖十五年置總管府

至元五年降散府九年改下路總管府

明山東布政司兗州府東平州吳元年改東平路爲府七年降

州屬濟寧府廢須城縣其地直隸於州十八年來屬

附

洪武初

置東平千戶所

國朝山東布政司泰安府東平州初因明舊雍正二年直隸布

政司十三年降散州來屬 裁千戶所

州志道光五年修沿革秦碭郡須昌縣按須昌秦東郡屬

知州周雲鳳

紀要本通典東平秦碭郡以東平梁國所分梁碭所分也

此唐天寶十三載前州郡沿革後并濟陽已不可用況今
州乎 前漢無壽良後漢有壽張已謬唐宋金元皆列壽

張明不列以明徙今治抑知隋以後壽張已非漢舊乎

古蹟以隋宿城爲古宿國已誤又別出無鹽城矛盾甚矣

陽穀故城隋置縣按此古邑非隋縣 桃鄉卽後漢光

武紀之桃城此沿革懷誤注

詳鄒縣

東阿縣

周齊穀邑清邑周首邑留舒邑樛邑衛桃邱邑

西境當有柯邑地南境當有陽

地穀

穀邑卽今縣治春秋莊公七年夫人姜氏會齊侯於穀杜注
齊地今濟北穀城縣又三十二年城小穀杜注齊邑濟北穀
城縣城中有管仲井左傳城小穀爲管仲也按留舒違穀七
里留舒城在魚山上魚山在縣西北八里今治卽古穀邑矣
又小穀是魯地非管仲所封詳前錄

春秋隱公四年冬及宋公遇於清杜注濟北東阿縣有清亭
水經注濟自魚山北逕清亭東京相璠曰今濟北東阿東北
四十里有故清亭按當在今治西北不遠

又文公十一年左傳齊襄公之二年

魯桓十六年水經注引
無齊字與魯襄混淆志

引作桓公
十八年誤

鄭瞞伐齊齊王子成父獲其弟榮如埋其首於周

首之北門杜注周首齊邑濟北穀城縣東北有周首亭水經

注濟過穀城縣西又北逕周首亭西按當在今治北

留舒邑故城在縣西北八里左傳哀公二十七年陳成子救

鄭及留舒違穀七里穀人不知水經注吾山上有柳舒城紀

要留舒城在東平州西誤

春秋僖公二十六年公追齊師至鄆弗及杜注在穀城縣西

後漢志穀城有嶺下聚晉志訛作烏下

桃邱故城在西南五十里今陶城鋪春秋桓公十年公會衛

侯於桃邱杜注東阿縣東南有桃城漢書王子侯表陶鄉侯

恢東平場王子疑卽此城或以爲任城之桃聚非

詳鄒縣

漢兗州東郡臨邑縣及東阿縣地荏平縣地須昌縣地

水經注鄧里渠於東阿故城北合將渠又東北逕荏平縣東

與臨邑縣故城西而北入大河又濟水逕周首亭西又北逕

臨邑縣東

逕其東境

水有石門後漢書宗室四王三侯傳封復爲

臨邑侯章懷注臨邑屬東郡

今本誤作海

在今濟州東亦名馬防

城通典盧縣

卽漢荏平

下漢臨邑縣故城在今縣東卽馬防城據

此是漢臨邑城在大河南鄧里渠東濟水西東阿東北荏平

東南

二縣指漢城

周首及石門之西北河在今縣北五六十里有

楊劉鎮可證漢荏平在後魏聊城縣南五十一里當在今治

北少西五十許里石門在今治東北十里濟水卽大清河漢

臨邑在縣北境明矣或謂卽銅城驛者其地頗近是備考禹

貢錐指稱在今荏平境以唐盧縣卽漢荏平故耳抑知今荏

平境皆在河北哉王莽改臨邑爲穀城亭當近穀城矣

漢東阿縣故城在西四十里今隸陽穀縣志亦載陽穀邑蓋

王古店本在縣與東平分界處穀城前漢亦須昌地荏平見

上故知今縣有前漢東阿荏平須昌地

後漢兗州東郡穀城縣臨邑縣及東阿縣地東平國須昌縣地

濟北國荏平縣地魏未詳補三國志臨邑穀城皆屬濟北與首同恐未確今闕疑俟考

舊說後漢穀城卽今治考水經注濟自魚山東又北逕清亭東又

北過穀城縣西

注

濟水側岸有尹卯壘南去魚山四十餘里

或疑銅城爲尹卯壘其地不能側
濟岸南去魚山當是西南去也

是穀城縣界魏土地記曰

縣有穀城山陽穀之地

時陽穀未置縣或古邑
地歟否則是穀城之訛

又有狼水出

東南大檻山狼谿西北逕穀城西又北有西流泉出城東近

山西北逕穀城北西注狼水又西北入清水

句絕近志與下
城字連讀誤

城西北三里

穀城
西北

有項王羽之冢按大檻山亦在今縣東南

惟此合水經注

山在今治東南三十里縣志稱狼水
出縣東南四里黃厓山與水經注異

西流水

今稱東流水其源出今治東南十五里天池山下之洪範池

自今治視之不得云城東近山也西流水於今治東南合狼

水不逕其北項王墓在今治南十許里穀城故城似當在其

東南也存疑俟考

晉兗州濟北國治穀城縣國治縣之盧子城又臨邑縣及東阿

縣地東平國須昌縣地

永嘉以前縣境當仍有荏平地

盧子城卽周首亭據杜預說

見前

爲穀城地水經注京相璠

曰今濟北郡

晉志作國

所治盧子城故齊周首邑也是晉已治此

補東晉志東阿有陽穀亭據元和志也按晉時陽穀係須昌

地杜預有明文不得以唐地志爲據

劉宋兗州濟北郡穀城縣郡徙治肥城故城又東平郡須昌縣

地大明元年省臨邑縣

宋志承初郡國有臨邑何志無蓋偶脫耳

後魏濟州濟北郡治盧子城爲盧縣地魏志盧縣有盧子城蓋後魏盧治碣礲城省穀

城析入及臨邑縣東阿縣後魏復置二縣移東阿來治今縣西

二十六里又兗州東平郡須昌縣地

魏志臨邑有臨邑城蓋復置非舊治也今未詳

又東阿有東阿城是後魏已非漢治自是迄唐東阿未徙治

元和志東阿縣東阿故城在西二十里漢東阿縣也括地志稱在西

南二十五里又云魚山在縣東南二十里穀城山在縣東三十二

里項羽墓在縣東二十七里括地志穀城故城在東阿東二

十六里卽今治至後魏迄唐東阿縣城里數矣

又濟州盧縣有柳舒城隋志盧縣有魚山是魏齊周隋盧縣

南境兼有古東阿地

高齊濟州濟北郡東阿縣及盧縣地周隋因之

隋以後有僑置之臨邑其實土蓋齊省入盧縣

唐河南道

鄆州東平郡

東阿縣初屬濟州武德四年復置穀城縣又

置昌城縣六年皆省天寶十三載來屬五代因之

漢書王子侯表昌城侯豐東平思王孫水經注河水自鄧里

渠北逕昌鄉亭北逕礪礪城西唐縣卽此城當在縣西北境

隋志東阿有嶮山狼水東南境已與今同而魚山以北猶屬

盧縣唐時魚山已屬東阿宋廢盧縣縣北境始與今同

宋京東西路東平府東平郡東阿縣

金山東西路東平府東阿縣

續通考東阿縣宋徙新橋鎮今治北八里舊城村是九域志

縣有北新橋鎮非宋徙也紀要一統志通志府縣志並稱宋

開寶八年徙治南穀鎮卽舊縣太平興國二年徙治利仁鎮金

縣有利仁鎮縣志云卽今縣南二十里棘城村紹興三年金人徙治於新橋鎮近志

會續通考稍誤至宋之二徙遍考無此說而牴牾尤甚元卽

志東阿在州西北五十里唐鄆州在今東平西北十五里也

寰宇記作四十五里太平興國在咸平前時州仍唐治舊縣

至彼不過三十許里棘城至彼不過二十許里與四十五里

之數皆不合是太平興國時東阿仍唐故治也寰宇記與元和志里數小

異者甚多五里之差不足爲疑九域志東阿在州西北六十里其時州已徙

今治本四十五里加十五里正得六十里是元豐時東阿仍

庚而開寶太平二徙有大有可疑者矣或出明代邑志附會

俟再考

元都省山東東平路東阿縣

明山東布政司兗州府東平州東阿縣

明東阿縣卽今治明志東阿下故城在西南洪武八年徙於

此則元代縣治卽舊縣鎮矣未詳何時所徙以有眾證之漢臨邑唐東阿今

皆不能確指其地有相近之留舒今治爲穀城無疑有西北

之項冢穀城在其東南亦無疑兩無可疑一無可信矣宋人

二徙觀近志似確鑿可憑證往籍皆齟齬不合金人一徙差

有續通考可據而又以金爲宋是其考古之難幾埒荏平矣

國朝山東布政司泰安府東阿縣初因明舊雍正十三年來屬

縣志

道光九年修
知縣李賢書

沿革西漢濟北郡穀城縣按西漢無此

郡並無此縣

隋兗州治滑縣按隋兗州治瑕邱且與縣

無涉

隋代不書縣名

唐宋金元皆無縣名惟稱緊縣

中縣並云天寶元年更名緊縣是直以今繁簡等字作縣
名矣鄙陋何至於此 古蹟無後魏至五代東阿古城

平陰縣

周齊郛邑石門邑

東北當有平陰邑地其城在
今治東北三十五里屬肥城

郛邑在西南三十里春秋襄公十八年左傳晉伐齊魏絳樂

盈以下軍克郛杜注平陰有郛山按今名亭山

石門邑在西南

里春秋隱公三年齊侯鄭伯盟於石門

杜注齊地或曰濟北盧縣故城濟水之門水經注京相璠曰今濟北盧縣故城西南六十里有故石門去水三百步蓋水瀆流移故側岸也按杜預所稱或曰卽指京氏所引似有脫文其地古在盧與臨邑分界處今在縣與東阿分界處

漢盧縣地文帝前元年於盧縣西南別築城爲濟北國治四年爲郡十六年復爲國武帝後元二年國除入泰山郡以國治城爲北安縣屬泰山郡後并入盧縣

何時并
入無考

北安縣故城在東十里今安城鋪漢書淮安衡山濟北王傳濟北王寬自剄死國除爲北安縣屬泰山郡按表時當武帝

後元二年也蓋本盧縣地別建城爲濟北王都國除自爲縣
後又并入盧縣故漢志不載縣東十里有安城鋪卽其故址
矣通典不知爲漢故縣以爲齊之鞍邑非也

後漢魏晉劉宋盧縣地後魏太原郡之盧縣地齊周肥城縣地

隋析肥城置今縣蓋高齊省太原盧縣入肥城

隋濟北州平陰縣開皇十四年置榆山縣大業初移今治改名

元和志隋於平陰西北二十八里置榆山縣云云已詳肥城

唐河南道州平陰縣初屬濟州天寶十三載來屬太和六

年省入盧與東阿開成二年復五代因之

宋京東東路東平府東平郡平陰縣

金山東西路東平府平陰縣

元都省山東東平路平陰縣至元中東境析入肥城縣

明山東布政司兗州府東平州平陰縣

國朝山東布政司泰安府平陰縣初因明舊雍正十三年來屬

縣志

嘉慶十三年修
知縣諭

續山東考古錄卷之八

滄州葉圭綬子佩甫述

武定府上

惠民縣

秦厭次縣地漢富平縣地後漢魏晉後魏厭次縣地後魏青州
會治縣之羊闌城齊周陽信縣地

水經注河水逕枋縣厭次南爲厭次河

或曰河當作津

元和志黃河

在厭次南

此隋唐厭次

三里知古厭次南境諸河秦與前漢河雖

不逕此然可證厭次境至此也今陷棣州城南之蠹索河卽
河故渠可證縣境皆厭次地

魏志厭次有羊闌城傅豎眼傳父靈越文成時拜爲青州刺史鎮羊闌城宋恐靈越在邊擾三齊乃以靈越叔父琰爲冀州從事乾愛爲樂陵太守樂陵與羊闌距河相對按宋樂陵郡漢千乘郡也羊闌城當在今治東南蓋後魏未得青州時青州遙領於此或以宋樂陵爲實土謂羊闌城當在縣西北則大誤 舊唐志棣州漢樂安郡通典以爲宋樂安郡按漢

宋樂安郡皆不在此王莽改厭次名樂安唐以名郡耳

隋滄州

渤海郡

厭次縣開皇十六年復置屬棣州大業二年屬又陽

信縣地

今治自高齊至宋初皆陽信地

隋厭次縣故城在東南四十里今北舊州城又曰陷棣州城

齊乘古蹟篇作在南四十里州郡篇誤作東北

唐河南道

棣州樂安郡

治厭次縣武德四年屬棣州後又屬滄州貞

觀元年屬德州十七年於縣復置棣州又陽信縣地五代因之

舊唐志厭次下不云屬德新唐志不載屬棣又屬滄今並書

舊唐志棣州武德六年併入滄州貞觀十七年復置於樂陵

領厭次滴河陽信蒲臺而樂陵自屬滄州考元和志復置棣

州於厭次正在貞觀十七年如在樂陵安有棣州倚郭而屬

滄州之理耶且何時移厭次乎樂陵乃厭次之訛齊乘稱隋

復置厭次於樂陵尤不可解元和志棣州隸河北道新舊

唐志則隸河南道疑景福大河改流後改屬也

州在改流之南

五代厭次縣故城在東南六十里今南舊州城又曰小新城

齊乘五代梁棣州刺史華溫琪以河水爲患徙州於厭次東

南卽唐縣東南也古蹟自注州東南五十三里宋史李仕衡傳作七十里

宋河北東路

棣州樂安郡

防禦治厭次縣建隆三年升爲團練尋改

防禦大中祥符八年徙縣於今治本陽信縣地州並徙

宋志大中祥符八年移治陽信縣界八方寺齊乘大中祥符

四年清河水溢壞城徙州治厭次按九域志亦作八年作四

年疑誤州縣並徙不得云移州治厭次所徙本陽信喬氏莊

今城內有地名喬子頭城西北有八方泊

金山東東路棣州防禦治厭次縣

元都省山東濟南路棣州治厭次縣中統二年置濱棣路至元二年廢

明山東布政司濟南府武定州洪武初棣州厭次縣並廢六年置樂安州不立縣宣德元年改

國朝山東布政司武定府治惠民縣初因明舊雍正二年武定州直隸布政司十三年升府置惠民縣爲府治

縣志

乾隆四十七年修知縣倭什布

沿革前漢屬千乘郡後漢樂安國

地一統志濟南志皆謂前漢屬平原郡通志謂前漢屬平原渤海二郡獨武定州志前漢屬千乘郡從之按通典棣州漢屬平原渤海千乘三郡地後漢爲平原樂安國地蓋

唐棣州五縣厭次商河平原地渤海蒲臺千乘地陽信則

渤海地最爲核實

後漢仍當敘入渤海

後周分置濱州棣州無千乘

地矣明武定州領四縣州治及商河樂陵皆平原地陽信

北境海豐樂陵北境皆渤海地

本朝升府後濱州及所

領來屬又有千乘地一統諸志皆有不合州志誤以唐樂

安郡爲後漢樂安獨以爲千乘地尤爲疏繆未升府以前

州境毫無千乘地於所獨無者而獨有之矣雖然州志仍

兼屬縣言之乃州府志體裁縱使無誤非惠民縣沿革

古蹟西漢厭次在陵縣東漢厭次在陽信辨詳兩縣又云

晉及元魏厭次在馬嶺城廢於北齊復於隋季至唐貞觀

中置棣州於厭次一徙於陷棣州則今之惠民是也再徙於古城爲五代之厭次三徙於喬家莊而爲宋元之厭次按晉厭次不治馬嶺城隋復置卽在陷棣州此似復置於馬嶺城唐始徙陷棣州者陷棣州不是今惠民喬家莊不僞爲宋元厭次唐封棣王者四人陷棣州有王府城址按唐諸王皆不就國此不足信

青城縣

漢青州千乘郡建信縣及東鄒縣地

縣志圖亦有花溝鎮蓋與鄒平分界處

建信縣故城在東北十里今新城鎮水經注潔水

自東北又

東北逕建信縣故城北應劭曰臨濟縣西北五十里有建信

侯城都尉治故城者也按新城鎮在花溝鎮即東東北東南

去高苑臨濟故城里數相符魏志臨濟有建新城是信轉爲

新由來久矣王莽改千乘郡曰建新疑莽時郡治此城劉信

起兵討莽遂改信爲新耳備考禹貢雖指稱在高苑西北五

十里亦據應說不知爲今青城地也紀要以此城爲劉宋高

陽僑郡新城縣誤

後漢臨濟縣地光武封嚴宣爲建新侯見後漢書吳漢傳是後

云云蓋後漢末復置漢初建信猶宋省也又光武罷都尉官據應劭

都尉於建信故城鄒平縣地魏晉因之劉宋後魏臨濟縣地

齊周末詳臨濟省隋唐五代宋金鄒平縣地北境當有隋以

元都省燕南河北道河間路青城縣太宗七年置屬濟南路中

統中屬陵州至元二年屬

元志青城本青平鎮太宗七年析臨邑寧津地置續通考本
清平鎮元析臨邑地置 皇輿表元太宗始以鄒平之清平
鎮又以臨邑寧津地置通志臨邑去青城三百里中隔濟陽

焉能分地及此且自漢以至金元亦無所謂寧津者未知何

據

謂皇輿表也

按元志自屬可疑寧津實金元所有存疑可矣

元代

州路往往壤地不相接如禹城屬曹州登萊屬般陽皆是即
墨可入掖縣平恩可隸堂邑則縣亦有之矣 皇輿表據元
史何得云未 齊乘不載青城稽其時已置縣未詳
知何據乎

明山東布政司濟南府青城縣洪武二年省入鄒平齊東

省後名青

池店 十三年復來屬

國朝山東布政司武定府青城縣初因明舊雍正十三年來屬

縣志

乾隆二十四年修
知縣方鳳

沿革漢梁鄒地誤

南北朝屬平

原以齊平原縣治梁鄒城也縱使縣境屬之亦不足以槩

南北朝

金天興二年始置縣尋廢其古蹟下又云元置

青平縣尋改此皆出杜撰故自矛盾

陽信縣

秦齊郡厭次縣

厭次縣故城在東南三十里元和志相傳秦始皇東遊至碣

石次舍於此因名之

漢青州平原郡富平縣

縣有雲城實渤海郡地詳雜
考未詳屬何縣疑屬陽信也

富平縣卽秦厭次縣城又名富城又名邵平城又名邵城水

經注商河

自切縣南

又東北逕馬嶺城城在河曲之中東海王越

斬汲桑於是城又東北逕富平縣故城北應劭曰明帝更名

關駟曰厭次縣本富平侯車騎將軍張安世之封邑非也按

漢書昭帝元鳳六年封右將軍張安世爲富平侯薨子延壽

嗣國在陳留別邑魏郡陳留風俗傳曰陳留尉氏縣安陵鄉

故富平縣也是乃安世所食矣歲入租千餘萬延壽自以身

無功德何堪久居先人大國上書減戶天子以爲有讓徙封

平原并食一邑戶口如故而稅減半十三州志曰明帝永平

五年改曰厭次矣按史記高祖功臣侯者年表高帝六年封

元頃爲侯國徐廣音義曰漢書作爰類是知厭次舊名非始
明帝蓋復故耳縣西有東方朔冢余按漢書東方朔傳稱平
原厭次人是武帝時猶名厭次朔墓在此則前漢之厭次富
平後漢之厭次爲一城可知商河逕其城北在馬嶺城後河
逕其南境在過枋縣後富平不在今陵縣水經注旣明白如
此魏志厭次前漢曰富平有富城舊唐志厭次本漢富平縣
通典厭次漢舊縣又爲富平縣元和志寰宇記並云厭次縣
本漢富平縣寰宇記又云劭城郡國志後漢爲厭次城有東
方朔冢陽信下云富平故城漢縣廢縣在今縣東三十里太
平御覽東方朔蹟皆係棗州不係德州諸書並無異說又如

此獨顏魯公東方像贊碑陰記稱厭次城在安德縣東北二
十二里廟西南一里蓋厭次本晉樂陵郡治夏侯氏立碑在
彼本文自明隋置棣州於厭次後廢唐初復又廢厭次於貞
觀元年曾屬德州德州在隋唐爲平原郡治與漢厭次屬平
原適合遂移廟於彼開元初重刻碑其地又適有漢重邱故城因附
會而爲此說魯公偶未之考耳 魏志青州樂陵郡陽信縣
有千乘城博昌城乃劉宋僑縣所有其滄州陽信下無此文
也寰宇記竟係二城於陽信甚誤

後漢青州平原郡厭次縣明帝永平五年改富平復名厭次建
安中置樂陵郡魏改國

晉冀州樂陵國治厭次縣西晉末曾爲冀州治

晉志樂陵國首厭次通鑑胡注晉分樂陵國厭次爲治所從

之云晉

分誤又晉志稱樂陵國爲漢置魏武於建安中置也

夏侯湛東

方朔畫像贊及碑陰並稱魏建安中誤齊乘同

晉石苞封樂陵郡公永嘉末王浚

以邵續爲樂陵太守是晉已稱郡 魏志厭次有富城邵續

居之曰邵城寰宇記引十六國春秋云內黃人邵續自號冀

州刺史屯富平城尋爲石季龍所擒滅是西晉末厭次爲冀

州治矣 補十六國志後趙樂陵國厭次下有馬嶺城又書

東海王越斬汲桑於陽信下考斬汲桑處卽馬嶺城後趙陽

信未徙此也至據魏志書邵城於厭次又據寰宇記書富平

城於陽信愈繆

後魏滄州樂陵郡厭次縣

後魏厭次縣卽馬嶺城在東南三十五里

高齊滄州樂陵郡陽信縣天保七年省厭次入陽信徙陽信來治馬嶺城周因之

寰宇記無棣縣漢陽信縣地高齊天保七年移於今陽信縣東馬嶺城齊乘馬嶺城在縣東十里其時縣卽今治似誤

隋滄州治陽信縣開皇六年於縣置棣州大業二年廢入滄

州渤海郡時治徙州來治三年改渤海郡

隋志渤海郡下開皇六年置棣州大業二年爲滄州陽信下

云帶郡據寰宇記改郡在大業三年也元和志隋開皇十七年割滄州陽信置棣州與隋志不同茲從隋志

唐河南道

棣州樂安郡

陽信縣武德初滄州還治饒安四年於陽信

復置棣州六年廢入滄州

據舊唐志新志作八年

貞觀元年省無棣縣入

陽信八年復析置十七年來屬

時復置棣州於厭次

五代因之

唐陽信縣故城在南少西七里今城子務

詳

新唐志陽信貞

觀元年省八年復置而滄州無棣丁云貞觀元年省入陽信八年復置寰宇記同知陽信下省字下脫無棣入焉四字

宋河北東路

棣州樂安郡

陽信縣大中祥符八年厭次徙縣境八方

寺詳惠民

宋陽信縣卽今治元豐九城志大中祥符八年徙州城及厭

次縣於陽信縣地復徙陽信於舊厭次縣續通考亦云徙陽

信於古厭次縣齊乘云厭次陽信互易其地考陽信自齊徙

馬嶺城後迄宋初無徙治之文寰宇記稱陽信在河曲之中

似宋初猶治馬嶺城其實非也其無棣下有云齊移於今陽

信縣東馬嶺城厭次下有云後魏又徙今陽信東馬嶺城此

宋初陽信已不治馬嶺城之明證元和志陽信南至州六十

里鉤盤河在縣西北四十里馬嶺城至陷棣州三十許里西

北至鉤盤河

卽屯別南賈今樂陵南徒駭河

七八十里又唐陽信已不治馬

嶺城之明證今城子務齊乘以爲漢陽信城固誤其城在馬

嶺城西北東至邵城三十里東南至陷棗州六十里西北至
鉤盤河四十里是唐元和時陽信已在彼無疑或陷於陷棗
州復置厭次馬嶺城相去稍近已徙陽信於此也夫陽信自
齊徙馬嶺城已爲古厭次地非宋大中祥符八年始徙古厭
次也厭次徙八方寺固齊以後之陽信地仍漢之厭次地陽
信徙今治固漢厭次地仍齊以後之陽信地陽信並未徙治
邵城何得謂舊厭次縣亦未徙於南舊州城北舊州城何得
謂互易其地近志不知宋徙卽今治妄稱徙於馬嶺城考九
域志稱陽信在州卽今東北四十五里其爲今治夫復何疑
蓋宋王存並不知陽信古城所在並不知馬嶺城已爲古厭

次地其時陽信治城子務遂以爲漢縣厭次徙今惠民城子務相去太近遂亦東北徙邵城在東遂以爲始徙厭次地耳王圻于欽皆因而重其繆

金山東東路棣州陽信縣

元都省山東濟南路棣州陽信縣

明山東布政司濟南府武定州陽信縣

明洪武初廢棣州六年始置樂安州此數年所屬縣當直隸於府

國朝山東布政司武定府陽信縣初因明舊雍正二年屬武定直隸州十三年州升府仍舊屬

縣志

乾隆二十四年修
知縣王允保

沿革殷薄姑氏國按寰宇記誤係

僑陽信之千乘博昌二城並未有僑樂陵之姑城此真繆

中之繆其圖竟指兩地以當薄姑千乘二城樂氏之貽誤

如是 王莽省陽信入東順亭按漢志瑗縣莽曰東順亭

其故城在齊河此亦沿寰宇記之誤

詳雜考

又重之以杜撰

隋廢樂陵郡徙渤海郡治陽信開皇六年復廢渤海郡

置棣州按隋徙滄州治陽信非徙渤海郡徙州在廢棣州

之後非廢郡置棣州改滄州爲渤海郡非改棣州 唐武

德元年改棣州爲齊州四年分置棣州治樂陵按唐改齊

郡爲齊州非改棣州武德元年並無棣州四年置棣州治

陽信舊唐志有明文不治樂陵 天寶初改棣州爲樂陵

郡陵當作安

寰宇記作安平郡亦筆誤

大中祥符八年徙馬嶺城誤

明州不設附郭按元州已多如此 永樂初以棣字犯

諱改樂安州按此似是而實非

海豐縣

周齊無棣地

春秋僖公四年左傳北至於無棣杜注齊境元和志鹽山縣

本齊無棣邑隋置無棣縣

今直隸慶雲縣

以縣南無棣溝得名按無

棣溝在今縣北亦無棣地矣林堯叟稱無棣在遼西孤竹以

桓公會至彼耳甚繆

漢幽州渤海郡陽信縣後漢末屬樂陵郡魏因之

陽信縣故城在北十七里今信城俗又稱信陽城據水經注
陽信故城在屯氏別河南北二瀆之間寰宇記無棣縣漢陽
信縣地東南三十里陽信故城存今縣北信城北有覆繡河
卽無棣溝實屯別北河也南有古堤卽屯別南河所逕西北
去慶雲東南隋無棣城里數相符稱名未改爲漢陽信城無
疑近志誤以其西北之漢荻苴侯城爲龍且城遂以此城爲
淮陰所築失考甚矣

晉冀州樂陵國陽信縣

後魏滄州樂陵郡陽信縣高齊徙治厭次之馬嶺城仍爲陽信

地周因之

魏志陽信治陽信城有鹽山神祠蓋後魏以前陽信兼有今直隸慶雲及鹽山之東南境

隋滄

州

無棣縣地

開皇六年析陽信置故城在今直隸慶雲縣東南五里或以爲齊無棣邑城無據

唐河北道

滄景城郡

無棣縣地貞觀元年省入陽信八年復五代

因之周於縣置保順軍

保順軍故城在西北二十里又名東無棣城

宋河北東路

滄景城郡

無棣縣治平中徙縣來治保順軍城以縣

令兼軍使

齊乘棣州無棣縣漢陽信縣地自注陽信故城在東南三十

續通考卷之八
里既知此何又以陽按于欽時已析置兩無棣此本寰宇記
信城子務爲漢城

而係於此方向里數皆不合矣又不載滄州無棣縣殊乖乘
以齊名之義 續通考海豐下隋唐俱置無棣縣宋仍其舊
按名仍舊而治則否也

金南京路滄州無棣縣

元都省山東濟南路棣州無棣縣元初來屬析其半別置無棣
縣屬滄州

元志無棣舊屬滄州元初割無棣之半屬滄州半以來屬按
屬滄者卽今慶雲縣稱西無棣此稱東無棣續通考稱元省
入滄州本朝洪武八年改屬武定州誤甚洪武八年
無武定州

明山東布政司濟南府武定州海豐縣洪武初省棣州之無棣縣六年置海豐縣

海豐縣卽今治明志海豐洪武六年析樂安州南境置又北有無棣縣洪武初省按海豐本無棣縣明初省復置於其東南二十里改今名耳樂安州在縣西南縣安得爲其南境乎志似誤

國朝山東布政司武定府海豐縣初因明舊雍正二年屬武定直隸州十三年州升府仍舊屬

縣志康熙九年修知縣胡公著沿革表永樂初改無棣縣爲海豐按縣

爲洪武六年別置非改名也又引武定志云縣名海豐在洪武六年籍以棣字在洪武

開尚未諱有武定碑文可考按別置
縣名海豐非爲避諱改名府志不誤

疆域鉤盤胡蘇二

河所引寰宇記有陵縣慶雲海豐等縣其爲杜撰可知古
蹟無棣城在西北二十里爲隋唐舊縣誤

續山東考古錄卷之九

滄州葉圭綬子佩甫述

武定府下

樂陵縣

漢青州平原郡樂陵縣幽州渤海郡重合縣定縣及千童縣地
樂陵縣故城在東南二十五里今魏王城後漢書邳彤傳章
懷注樂陵故城在今樂陵縣東元和志燕將樂毅所築 漢
志臨淮郡樂陵下云侯國此樂陵不云侯國考漢惟史高封
樂陵侯其子丹封武陽侯食邑在鄕可證高所封在臨淮不
在此水經注元和志並誤

重合縣故城在西北

里詳下

定縣故城在西北

里水經注屯氏別河北濱逕重平縣

故城南應劭曰重合縣西南八十里有重平鄉又東北逕重

合縣故城南又東北逕定縣故城南地理風俗記曰饒安縣

東南三十里有定鄉城故縣也按重平城在今德平西北三

十里樂陵在德平東北八十里至德平界五十里重合當在

樂陵西北境內二三十里舊稱在縣東南非是 饒安在縣

西北三十里今舊縣鎮定縣在其東南三十里當在縣北古里

小於今里 寰宇記定城在饒安南四十里據新饒安言也

漢志千童靈帝改曰饒安元和志饒安縣本漢千童縣卽秦

千童城據此似饒安千童是一城而寰宇記滄州下云後魏

熙平二年置州理饒安卽今饒安縣東

當作東南

千童故城饒安

縣下云唐武德元年移治故千童城貞觀十二年移治浮水

城卽今理

今直隸滄州新縣鎮俗曰尋縣

舊唐志亦稱移治千童城則千童

當別一城矣水經注無棣溝逕高樂故城北又東分爲二其

枝瀆東南逕樂陵郡西又東南逕千童故城東史記王子侯

年表曰故重也一作千鍾應劭曰靈帝改曰饒安也按酈氏

不云千童饒安有兩城則此千童城仍指饒安城高樂故城

卽今南皮東南之董村鎮無棣溝枝瀆自其東入樂陵郡界

又東南正今鹽山舊縣鎮地魏刁遵墓志稱葬於饒安城西

南孝義里其墓在舊縣西少南八里高家莊南舊縣大寺佛
座多魏齊時饒安人題名舊縣爲舊饒安縣無疑寰宇記引
十三州志云饒安東南二十里有童鄉亭而疑爲章鄉故城
章訛爲童考章鄉故城在南皮東南今猶名章鄉莊史記表
千鍾侯徐廣注曰一作重童本童之訛是千童縣亦可去千
字而稱童縣童鄉亭旣在饒安東南非千童故城而何以今
里計當在舊縣東南十二三里樂陵北有千童鄉或在樂陵
境內也紀要稱在滄州東北鹽山志稱在其縣東北寰宇記
稱在無棣一統志以爲皆誤是也

後漢青州平原郡樂陵縣冀州渤海郡重合縣及饒安縣地童

改後漢建安中樂陵縣屬樂陵郡魏晉因之

後魏滄州樂陵郡治樂陵縣初析置義興郡太和中廢

魏志太和之上

衍晉字

移樂陵郡來治又安德郡重合縣正平元年省

魏志入安陵寰宇記

作樂

太和十八年復又浮陽郡饒安縣地齊天保七年省重合

入樂陵

見寰宇記

周因之

魏志樂陵有樂陵城寰宇記後魏永平二年徙樂陵於今縣東五十里樂陵故城按亦當在今縣東也或曰卽魏主城而別無城以當漢城再考

隋滄州

渤海郡

樂陵縣及饒安縣地開皇初廢樂陵郡十六年分置

鬲津縣

詳下

大業初省入樂陵

唐河北道

滄州景城郡

樂陵縣及饒安縣地武德四年復置鬲津縣

與樂陵並屬棣州六年還屬貞觀元年省鬲津入樂陵太和二年屬棣州旋還屬五代因之

唐樂陵縣故城在西北二十五里寰宇記唐貞觀元年自樂

陵故城

指後魏縣

移縣於今所元和志樂陵縣重合故城在縣東

二百步寰宇記又云鬲津枯河在縣西三里東北流入饒安

界鉤盤河在縣東南五十里按鬲津河在今治北三十許里

唐縣在其南

河逕其西則城在河南

去河僅三里一統志稱樂陵西北

二十五里有樂陵故城正重合故地卽唐縣也而通府縣志

皆所不載余鄉亦不聞有此城蓋湮沒久矣

隋唐鬲津縣城無考唐鬲津於貞觀元年省樂陵卽於是年徙唐樂陵城近鬲津疑徙鬲津故城也備考近志有謂卽舊縣鎮者按金志有新舊兩饒安鎮新卽今新縣鎮舊卽舊縣鎮隋時饒安猶治舊城不得又爲鬲津縣治

宋河北東路

滄州

景城郡

樂陵縣

宋樂陵縣故城在西南五十里今舊樂陵城宋志樂陵熙寧二年徙治於咸平鎮通志稱唐貞觀中徙咸平鎮誤 九域志樂陵有楊攀口鎮今隸直隸寧津縣知唐宋樂陵有今寧

津東境

金南京路滄州樂陵縣

元都省燕南河北道河間路滄州樂陵縣

明山東布政司濟南府武定州樂陵縣洪武元年屬濟寧府二
年屬濟南府六年屬樂安州

明樂陵縣卽今治明志洪武二年移治富平鎮考九域志樂
陵有郭橋鎮今治北門橋猶名郭鎮橋富平其改名也

國朝山東布政司武定府樂陵縣初因明舊雍正二年屬武定
直隸州十三年州升府仍舊屬

縣志乾隆二十九年修沿革後漢省千童誤 劉宋樂陵

郡不在此 封國有漢厭次侯爰類富平侯張安世並云

厭次卽樂陵因富平鎮致誤 古蹟樂陵古城有二按樂

陵古城凡有四近志皆無後魏唐兩城 福城在今縣西

北按寰宇記福城當在濟陽 東鄉城前漢東鄉侯方爲

梁敬王子按漢志沛郡有東鄉侯國梁王子那得封此魏

志樂陵有東鄉城卽定鄉音轉耳

商河縣

據水經注商河又名小漳河以聲相近也則當讀夏商之商而隋志唐志皆作滴字通典作商音滴夫許

商所開之說雖見元和志而漢書溝洫志水經注皆無此說蓋漢建始四年議開屯氏諸河遺許商行視以爲用度不足而罷河平三年商與王延世等塞決河安有開新河之事乎唯水經注已作商作滴者恐係筆誤也

漢青州平原郡朮縣後漢省入般縣魏晉後魏因之齊周末詳

朮縣故城在東北四十里今棘城村水經注商河自般縣南又東

逕朮鄉縣

當云朮縣

故城南應邵曰般縣東南六十里有朮鄉城

故縣也棘城村在商河北西北去般城里數相符棘柘之轉音也禹貢錐指稱在縣西北非是邢侗云棘城疑爲陳師道集雞籠城之訛未知何據 後漢縣東境或有入厭次者

高齊般省入平昌厭次省入陽信縣境或爲兩縣地

隋滄州渤海郡滴河縣開皇十六年置

滴河縣卽今治元和志滴河縣本漢柘縣後漢省隋於此置滴河縣因北有滴河以名之又云滴河在縣北一十五里按漢柘縣城在商河北隋商河城在商河南今縣北十五里馬頰河卽商河也續通典誤稱商河在縣南寰宇記兼採二說竟不自覺矛盾齊乘遂逕以商河城爲柘城近志遂指縣南

黃河故道爲商河一語之繆踵而加厲矣

隋志滴河下云又有後魏潔沃縣後齊省考後魏兩潔沃劉宋僑置者固不能至縣境其滄州之潔沃仍漢舊縣境

詳濱州

與縣中隔厭次亦不能有其地考宋武移潔陰於巨潔亭縣南境接濟陽實有古潔陰地或誤以爲潔沃歟否則齊省潔沃或亦入陽信隋置商河東境當有高齊陽信南境其地本古厭次潔沃相接處因此致誤歟存疑俟考

唐河南道

棣州安樂郡

滴河縣貞觀元年屬德州十七年屬五代因

之

宋河北東路

棣州安樂郡

商河縣

系上頁才下金
○
○
○
金山東東路棣州商河縣

元都省山東濟南路棣州商河縣

明山東布政司濟南府武定州商河縣

國朝山東布政司武定府商河縣初因明舊雍正二年屬武定直隸州十三年州升府仍舊屬

縣志

道光十五年修
知縣龔廷煌

沿革前漢爲枋爲漯沃按隋志第云

有後魏漯沃尙有不合此須存疑 魏晉劉宋皆漯沃地

按劉宋漯沃在漢千乘郡地斷不及此 元爲無棣縣至

元初改後復改爲商河又云元地志無棣至元二年併入

樂陵以縣治入濟南之棣州尋復置又無棣宋金屬滄州

元初以半屬滄州半屬棣州又商河爲中無棣爲下元史並載似各爲縣而後併入商河按此條之繆殊不可解元無棣並未改商河並未省入樂陵並未省入棣州並未併入商河元史並未有此文無棣商河絕不接壤無故牽混成此巨繆殆不可解

濱州

漢青州千乘郡漯沃縣及平原郡富平縣地後漢省漯沃入千乘縣又平原郡厭次縣地魏復置漯沃縣屬樂陵國

水經注地理風俗記曰千乘縣西北五十里有大河河北有漯沃城故縣也按千乘城在高苑北二十五里通典以蒲臺

今蒲臺鎮為漢漯沃縱非故城當在其西不遠一統志稱在今蒲

臺縣西北固是但蒲臺西北大清河正古河渠漯沃城在河

北當在濱州南禹貢錐指稱在今蒲臺東則在干乘城東北

不合紀要稱在蒲臺東南愈繆

魏志厭次有蒲臺祠水經注商河自富平北分為二水南水南有

蒲臺三齊略曰鬲城東南有蒲臺今東去海三十里齊乘本

此稱蒲臺為有鬲氏國後漢以漯沃為鬲縣考證曰于氏云

云蓋續漢志無漯沃縣故據劉昭注鬲縣下注引三齊記鬲城東

南有蒲臺也按水經注云云見上今為濱州地後漢時中隔厭

次漯陰樂陵般縣考證誤謂鬲城在德平故不數安德不當與鬲城接而蒲臺

縣謂今

又在其南四十里豈得爲有鬲氏之國乎伏琛齊記或

緣鬲爲平原近縣故以表識方面猶言郡之東南境耳自注

云又按後魏書厭次有富城卽富平之省文酈注敘商河南

北二水承逕富平城之下亦疑訛富爲鬲也余按前說未免

曲爲之辭注說確然無疑魏志蒲臺祠本在厭次可爲明證

蓋齊記筆誤劉氏酈氏皆仍而未改劉氏逕係鬲縣下致成

于氏巨繆此臺在州東十里今日秦臺則州北境爲厭次地

劉宋志灑沃下前漢屬千乘後漢無何云魏立當是魏復立

也

宋志僑州郡縣下皆實土沿革其實名是而地非也魏志亦如此幸每載其山川古蹟後人賴以稽考茲引此以證

曹魏復立灑沃非謂宋縣在此也

補三國志灑沃下未引此條人將不知所

據矣寰宇記稱宋復置誤

晉冀州樂陵國漯沃縣及厭次縣地

後魏滄州樂陵郡漯沃縣及厭次縣地齊周末詳

魏志漯沃治亂城有后父城水經注魏改漯沃爲後部亭俗

遂名之曰右輔城按右卽后字訛后輔城卽后父城蓋後魏

徙治亂城改漢城爲亭也亂城今不可考然漢城在縣當仍

漢縣故境或曰卽隋蒲臺城備考

高齊漯沃未詳省入何縣州北境當爲齊陽信地

隋

滄州渤海郡蒲臺縣開皇十六年置隋亂廢又厭次縣地

蒲臺縣故城在東南二十五里今蒲臺鎮寰宇記蒲臺縣州

濱東南二十五里

又云一作五十里非是

元和志蒲臺在縣北三十里

按宋省蒲臺入渤海爲鎮九域志渤海有蒲臺鎮卽故治今蒲臺縣乃金縣 元和志蒲臺縣本漢漯沃地隋開皇三年改屬滄州十六年改爲蒲臺縣據此是隋初復於亂城置漯沃開皇十六年乃改名非始置矣

唐河南道

棣州

樂安郡

渤海縣蒲臺縣武德三年復置蒲臺縣屬鄒

州八年屬淄州貞觀六年省入高苑七年復垂拱四年析蒲臺厥次置渤海縣景龍元年蒲臺來屬五代梁唐晉漢因之於渤海置贍國軍

渤海故城在東四十里天寶五年移於今州治元和志渤海

縣本漢

當作隋

蒲臺縣地垂拱四年分置在棣州東一百一十

里天寶五年以土地鹹鹵自縣西移四十里就李邱村置按
新唐志渤海析蒲臺厭次置不僅蒲臺地也

舊唐志淄州下武德八年又以廢鄒州之長白高苑蒲臺三
縣來屬景龍元年又割蒲臺隸之後割屬棣州按新唐志蒲
臺於景龍元年屬棣州舊志隸之後割四字是衍文

後周河南道濱州治渤海縣顯德三年升贍國軍爲州又蒲臺

縣五代史濱州以其濱海爲名也

宋河北東路

濱州治渤海縣

大觀二年賜郡名大中祥符五

年省蒲臺入之爲鎮慶歷三年析置招安縣

金山東東路濱州治渤海縣又析置蒲臺縣明昌三年析置利津縣

元都省山東濟南路濱州治渤海縣州初屬益都路中統三年屬濱棣路至元二年屬

明山東布政司濟南路濱州洪武初廢渤海縣其地直隸於州國朝山東布政司武定府濱州初因明舊雍正二年直隸布政司十三年降散州來屬

州志

康熙

年修

沿革漢至隋但書屬某郡無縣名不

合古蹟漢後魏兩溲沃城隋蒲臺城唐渤海城皆無之

利津縣

漢漯沃縣地蓼城縣地後漢千乘縣地蓼城縣地魏晉同前漢
後魏滄州漯沃縣地齊周末詳隋蒲臺縣地唐五代蒲臺縣地
渤海縣地宋渤海縣之東永利鎮

近志以縣爲齊渠展地管子所云渠展之鹽也無確據

後魏時蒲

臺東去海僅三十里今濱州東十里秦臺也今利津霑化海
豐諸縣古未必有其地矣後世海水東去漸開諸縣近志於
蒲臺濱州利津霑化皆云古漯沃地一縣有如許大耶今
諸縣爲古何地亦第約略言之非敢謂古縣境土所必至

漢千乘郡有蓼城縣都尉治水經注河水自千乘北又東北過蓼

城縣北其治所雖不可考今蒲臺東境利津南境樂安西北
境大約皆有其地今本水經注訛蓼作黎禹貢錐指遂改作
利城微論在齊城北五十里之利縣不能在千乘縣東北且

縣名利不名利城也後漢志劉昭注誤引杜預釋攝城之文於蓼城下齊乘逕以爲古聊攝地失考甚矣

九域志渤海縣有東永利鎮厥次有永利鎮也通志利津故城在大清河東縣東門外縣志云遺址尙存考金置縣迄今未徙

治此或古鎮城或別有古城俟考

金山東東路濱州利津縣明昌三年置

利津縣卽今治

元都省山東濟南路濱州利津縣

明山東布政司濟南府濱州利津縣附洪武初置樂安千戶所

後改名武定

武定千戶所故城在東北七十里卽豐國鎮

國朝山東布政司武定府利津縣初因明舊雍正二年屬濱州直隸州十三年來屬 裁千戶所

縣志

康熙十一年修
知縣韓文焜

古蹟渤海舊城在縣西北濱州界唐

置縣治永利鎮金升爲縣遂省入州按旣知渤海城在西北何又以爲治永利鎮旣爲渤海縣何以金又升縣旣云升爲縣何以又云省入州旣知在濱界何又入縣志無一句不誤無一句不矛盾

蒲臺縣

漢至隋同利津縣唐五代蒲臺縣地宋渤海縣地

隋置蒲臺縣在縣北隔大清河五里今隸濱州宋省

互詳濱州

金山東東路濱州蒲臺縣金初復置

金蒲臺縣卽今治金志無始置之年疑劉豫復也

元都省山東般陽路蒲臺縣初屬濱州中統五年屬

明山東布政司濟南府濱州蒲臺縣洪武元年屬淄川州二年屬

國朝山東布政司武定府蒲臺縣初因明舊雍正二年屬濱州直隸州十三年屬

縣志

乾隆二十八年修知縣嚴文典

沿革三國千乘郡濰沃縣按後漢

已改千乘郡爲樂安國魏濰沃屬樂陵國

霑化縣

漢陽信縣地富平縣地後漢魏晉後魏陽信縣地厭次縣地齊周陽信縣地隋陽信縣地厭次縣地唐五代渤海縣地

舊以縣爲漢漯沃縣地以縣爲渤海所分渤海又蒲臺所分故也不知唐渤海北境已爲厭次縣地霑化又在其北烏得爲漯沃地縣治西去漢陽信故城較近漢陽信東界諸海縣境當爲漢厭次陽信兩縣地

宋河北東路濱州招安縣慶歷三年置熙寧五年省爲鎮元豐二年復

招安縣卽今縣治本招安鎮

金山東東路濱州霑化縣本招安明昌六年改

元都省山東濟南路濱州霑化縣

明山東布政司濟南府濱州霑化縣

國朝山東布政司武定府霑化縣初因明舊雍正二年屬濱州
直隸州十三年屬

縣志

沿革後漢省漯沃入漯陰誤甚

武定府補遺

惠民縣

宋史眞宗紀大中祥符七年冬十一月乙酉濱州河溢八年正月戊戌徙棣州城齊乘云四年清河溢壞城徙治者誤矣又施昌言傳除河北都轉運使言事者以爲濱棣等六州河可涉宜有城守如邊以待契丹詔昌言與宦官楊懷敏往視昌言曰六州地千里又河數移徙城之甚難而無利契丹未渝盟先自困非便也按宋初州郡十九無城六州謂濱棣德滄貝博也張存傳契丹與元昊結昏聚兵塞上存言河北城久不治宜留意乃以爲都轉運使盡城諸州

濱州

魏書爾朱翊傳爲青州刺史天光之赴韓陵也世隆長史房謨
爲齊州行台募士馬以趣四瀆口翊總東陽之眾亦赴亂城揚
聲北渡以爲犄角之勢按旣云揚聲北渡亂城當在河南矣
輿地廣記濱州自唐虞以下地理與涿州同涿當作棣

海豐縣

寰宇記保順軍本無棣縣之保順鎮

續山東考古錄卷之十

滄州葉圭綬子佩甫述

臨清直隸州古以州統郡南北朝以來析州愈多愈小後周置州始不能直隸京師元以行省統諸府路府路統諸州亦有直隸中書省及行省之州明代州無不領縣者亦無不屬府者無直隸州之名國初因明舊而州不領縣並非朝廷改制實因元明盡廢州所治縣或升縣爲州以州而行縣事與縣等名爲領縣而同爲府屬縣遂逕屬於府並領縣之名亡之雍正以來領縣之州皆直隸布政司遂爲定制

本州

漢冀州清河郡貝邱縣及厝縣地詳清平魏郡清淵縣後漢因之

厝改魏清淵屬陽平郡

貝邱縣故城在

里元和志臨清縣貝邱故城在縣東

南五十里寰宇記作十五里字倒也近志據之又誤以今州治爲唐臨清遂謂在清平境今州南十

五里有古城西北去臨清故城里數略同但後魏貝邱城在

漢城東北僅十里此城未詳漢城或後魏城也俟再考

清淵縣故城據水經注當在臨清故城之西南紀要謂在州

東南五十里甚謬余疑卽館陶之青陽城見館陶姑從舊說係

此

九域志隣清有張甲河考水經注張甲河首受屯氏別河於

信成縣州西北境當有漢信成縣地但未知今境與宋同否

故不書漢信成故城在甘陵縣西北五十里隋唐貝州西北十二里水經注寰宇記有明據禹貢錐指屯氏諸河

圖此城在今臨清州南五十里不在州境亦當在館陶境矣甚不合

晉冀州清河國貝邱縣及清河縣地又司州陽平郡清淵縣後
趙石勒置臨清縣屬冀州建興郡後廢

臨清縣故城在西三十五里今倉集水經注田融言趙立建

興郡於廣宗城內置臨清縣於水東清淇水東自趙石始也

後魏司州陽平郡臨清縣太和二十一年復又清淵縣地徙治
今冠縣清水堡又清河郡貝邱縣及清河縣地

舊唐志後魏改清泉爲臨清誤

寰宇記後魏移貝邱於故城東北十里今縣東又有貝邱故
城卽後魏所置按如州南十五里者爲漢城後魏貝邱城當
在今治南不遠或曰卽金臨清城備考

高齊洛州清河郡貝邱縣地齊廢臨清縣又廢貝邱縣入清河

改清河爲貝邱隋時改清陽卽漢厓縣後漢甘陵縣又清淵縣地周因之

隋貝邱縣州清河郡臨清縣開皇六年復屬毛州十六年析置沙邱縣復

置貝邱縣初於平晉城置貝邱縣改爲清平又於此置貝邱同來屬大業二年省沙邱

入臨清省貝邱入清淵

沙邱縣治無考州志云在西 貝邱復置或漢城或後魏城

亦未詳

唐河北道貝州清河郡臨清縣武德四年復置沙邱縣同屬毛州貞

觀元年省沙邱入臨清來屬大歷七年屬瀛州析置永濟縣貞

元末還屬五代梁屬大名府唐屬興唐府晉屬澶州漢屬大名

府周因之

宋河北東路大名府魏郡臨清縣

金大名路恩州臨清縣

金臨清縣故城在南八里近志稱此城爲宋徙考九域志臨

清縣在京即大名東北一百五十里則元豐時猶在故治州志

云宋高宗時河決所徙然則金徙非宋徙矣

元直隸都省山東濮州臨清縣

明山東布政司東昌府臨清州洪武二年臨清縣來屬宏治二

年升爲州

附

洪武初設臨清衛

洪武二年移今治宏治二年移於西南三里今日新城實舊

城景泰元年復還今治今日舊城實新城

國朝山東布政司臨清直隸州初因明舊乾隆四十一年直隸

布政司

州志

乾隆四十九年修知州張度未竟五十年知州鄧希魯踵成之

沿革後魏於晉之清

淵城別置清淵縣按上文於後趙但書臨清一縣意謂趙

省清淵入臨清後魏復析置清淵也抑知趙省清淵古無

此說而後魏清淵並非晉治乎

隋司州部謬

古蹟漢

清淵城唐省入臨清按當云唐省清水入冠氏漢清淵城

析入臨清

劉苑二碑在貝邱城水經注云云按此出寰

宇記

宋高宗時徙治曹仁鎮按金志臨清有曹仁鎮則

宋高宗時所徙非此地

武城縣

周趙東武城邑

史記平原君傳封於東武城寰宇記武城縣隋區宇圖云夏

禹七代孫芒

今本說作芸

封公子武於此建國

國名無考路史稱武城國恐不然也

山河兩戒考趙邑有平原按史記不云平原君封於平原似非邑名寰宇記通考並云縣有弦歌臺世俗附會耳

漢冀州清河郡東武城縣定襄郡有武復陽縣東北境當有城故此加東

東武城縣故城在西北十許里又名夏城寰宇記古武城在

縣北十里據唐縣言也舊唐志武城舊治古夏城

復陽縣故城在西北

里水經注清河自東武城又東北逕復

陽縣故城應邵曰東武城西北三十里有復陽亭故縣也世

名之檻城

後漢書宦者傳李建封復陽侯檻疑建之訛

按縣西北三十里饒陽鎮

去漢縣合古里三十之數當卽復陽故治也

後漢冀州清河國東武城縣省復陽入之三國魏因之晉除東

字據寰宇記晉志有東字

前秦苻堅清河國治

寰宇記苻堅長子封清河王居此

後漢司州清河郡武城縣眞君三年省繹幕縣入之太和二十二年復析置高齊天保七年移治於漢信成縣故城縣仍爲武

城地周因之

周建德六年於清河郡置貝州州郡皆治武城

魏志武城有武城則後魏已非漢治今未詳寰宇記後齊天保七年移武城於漢信成縣故城考齊於是年移清河郡於

彼或後魏武城已移於彼寰宇記有誤歟

隋

貝州清河郡

武城縣開皇初改武城爲清河縣於武城故城復置

武城縣

隋志清河下舊曰武城高齊武城也武城下舊曰東武城古東武城也據寰宇記隋於漢信成城東南十二里別築城移貝州治之復置清河縣於新城武城還治東武城乃紀要逕以今清河縣爲東武城何其繆耶

唐河北道

貝州清河郡

武城縣五代因之

唐武城縣故城在西門外衛河西岸舊唐志武城下調露元年移於今治寰宇記唐調露元年武城縣移於永濟渠北義

王橋西二里

宋河北東路

恩州清河郡

武城縣

縣徙今治古無明文紀要以爲宋徙考寰宇記稱舊治爲今縣外城基九域志武城有舊縣鎮金志武城有武城鎮今所謂舊縣與武城鎮者卽指衛河西岸言一統志云大觀中徙金大名路恩州武城縣

元直隸都省山東高唐州武城縣初隸東平路至元七年屬明山東布政司東昌府高唐州武城縣

國朝山東布政司臨清直隸州武城縣初因明舊乾隆四十一年屬

縣志 乾隆十四年修
道光二十一年續知縣 厲秀芳

夏津縣

漢鄒縣地靈縣地後漢魏晉後魏因之齊周末詳

續通典夏津本漢靈縣地漢初爲鄒縣按縣本兼有兩縣地
而措語殊矛盾 高齊鄒入平原靈亦省縣境未詳何屬

隋 貝州清河郡 鄒縣開皇十六年復置又析清河置夏津縣大業初
省入清陽縣

隋鄒縣故城卽今縣治寰宇記夏津縣隋復於此立鄒縣一
統志謂卽今治是也

隋夏津縣故城在北三十里今新縣店又名孫生鎮寰宇記

稱隋夏津城在武城東南四十里以與古夏津城相近

城宇疑衍

因以爲名新縣店去武城方位里數皆合蓋隋初夏津與郟兩縣並置唐初夏津亦在新縣店後省而天寶時改郟爲夏津故舊志以孫生鎮爲隋之夏津是也近志不察謂隋及唐初之郟縣在漢治唐天寶時徙新縣店又有謂隋夏津無考者皆未詳考耳

唐河北道

貝州清河郡

夏津縣武德四年復析清陽置夏津縣九年

省天寶元年改郟爲夏津五代因之

宋河北東路大名府魏郡夏津縣

近志稱金徙今治考九域志夏津有孫生鎮縣志云孫生鎮

卽新縣店則非金徙治矣

金大名路大名府夏津縣

元直隸都省山東高唐州夏津縣初屬東平路至元七年屬

明山東布政司東昌府高唐州夏津縣洪武二年省尋復

國朝山東布政司臨清直隸州夏津縣初因明舊雍正八年屬

東昌府乾隆四十一年屬

縣志乾隆六年修沿革誤以隋鄒縣爲漢縣 古蹟有負

知縣方學成

夏殊無依據 鄒城在東北三十里按漢縣在平原去縣

不止三十里

邱縣

漢冀州魏郡平恩縣本館陶地宣帝析置又廣平國南曲縣

平恩縣故城在西南四里

南曲縣故城在北四十里今古城營

一曰北營集

水經注漳水

自

邱北卽裴南肥鄉南列人西

又東北逕平恩縣故城西

後漳水改從城東流

東北逕

南曲縣故城西應劭曰平恩縣北四十里有南曲亭故縣也

紀要誤以南曲爲斥邱城其直隸成安縣亦知斥邱城在其

東南十五里矛盾殊甚至因斥邱而及春秋晉乾侯邑

杜注在斥

邱愈繆通志並稱卽裴城在縣境又因斥邱而誤及者

後漢冀州魏郡平恩縣省南曲入之魏屬廣平郡

晉司州廣平郡平恩縣後魏因之高齊天保七年省斥漳縣入

之移治斥漳城周因之

元和志平恩縣後魏省尋置魏志無此說

隋洛州武安郡平恩縣開皇六年改平恩爲洛水

唐省入曲周故城在直隸曲周縣西

五十里於平恩故城復置

舊唐志平恩下隋自斥漳城移於平恩故城置寰宇記隋移

平恩於平恩州今理川字似卽字之訛

唐河北道

洛州廣平郡

平恩縣五代因之

宋河北西路

洛州廣平郡

平恩縣金省入曲周縣爲鎮

元都省山東東昌路邱縣至元二年析入堂邑縣二十六年置

邱縣卽今治元志邱縣本爲鎮隸曲周至元二年併入堂邑

金已併入曲周此可
云析入不可云併入
二十六年山東宣慰司言邱縣併入堂

邑差稅詞訴相去二百餘里
壤地絕不相接往復非便平恩有戶二

千七百升縣爲宜遂立邱縣隸東昌按平恩古無邱名宣慰

上言已稱邱縣蓋史追改之

明山東布政司東昌府臨清州邱縣初因元舊宏治二年屬

國朝山東布政司臨清直隸州邱縣

縣志

乾隆四十七年修
知縣黃景會

沿革斥邱爲館陶之別鄉按水經

注平恩爲館陶之別鄉
南宋魏郡隸冀州按誤以僑州

郡爲實土況劉宋僑魏郡既無平恩又無斥邱
斥邱北

齊移治斥漳城按平恩沿革皆易以斥邱不知縣與斥邱

毫無干涉元人似誤以斥漳爲斥邱平恩曾治斥漳城遂
以邱名縣耳徐文范東晉南北朝輿地表稱漢有邱縣齊
省斥漳入邱及平恩而移邱治斥漳城按元
以前無邱縣名齊移平
恩於斥漳城非移邱也

